





平園續稿卷第十九

周益文忠公集五十



記二

太和縣仰山二王行祠記

聖人成民切矣既撫之以仁又惠之以政尚慮天降之
 災人為或弗能給則致力於上下神祇周禮大祝掌六
 祈是也至小祝復載其目曰祈福祥順豐年逆時雨寧
 風旱彌災兵遠罪戾凡民之所願欲尚有出於此者乎
 自釋教盛於中國故又即佛廬而致禱焉蓋神能變化
 無方佛能攝受有情其為道雖不同精誠可格則均若
 乃聰明正直廣大慈悲兼而有之惟袁州寧惠廟二王

為然王兄弟皆龍也自晉永嘉定仰山之獼潭至唐會昌三年蓋五百餘載有僧號小釋迦名惠寂者來自柳州卜庵此山二王欽其道行施山為寺而徙廟堵田今寺以太平興國為名其上廟基存焉治平元年郡人李觀嘗為記刻石神之歸心釋氏固已昭然而巫祝恃牲牢以為利流膏割鮮神或厭之迨元祐六年住山佛印禪師了元卜於神曰血祭乎蔬食乎神曰蔬食哉厥後厥後謁廟者遂以伊蒲塞為饌張丞相商英適漕本路又為之記功利及物逐日以新自士庶達於郡邑或繪事于家或塑像僧舍或祔享別廟祈求者不絕吉州太

和縣進士劉千齡謂非設行祠不足以揭虔妥靈乃即縣西北五里登科岡背陰面陽創正殿三間鄉人爭附益之夾以廊廡各十二楹前為門三後為寢室七至於釋教祀徐璠與夫樂樓享亭下暨厨庫罔不具備始事於慶元丁巳之正月落成於戊午之十月嚴翼輪奐觀者起敬知縣事卓洵頻歲請禱曰雨曰暘其應如響千齡介予故人曾寅亮謁文記之惟皇上帝分命山川之神各主一方捍災禦患載於經傳不可誣已然諸侯所祭不過境內今二王以神龍有截之威合大雄無邊之力自袁徧于江西自江西放乎嶺表咸被其賜而祭享

之夫豈泛：神祠加惠一方者所可比哉按唐藍谷神
名在祀典而依悟真精舍詩人美之曰若歲有水旱詔
使脩蘋蘩以地清淨故獻奠無葷羶願借是詩代享神
迎送之詞至於封爵之崇事實之衆圖志具在此不復
云六年十一月五日

袁州宜春臺字惠新祠記

袁特字惠二王為司命郡以宜春臺為勝境壯亭榭於
林木之表山川城郭俯視無遺輟燕遊以奉神敝則改
為者太守徇邦人之志也按仰山距城七十里而遠二
王既敬釋氏遜山與寺徙廟堵田距城三十里而近人

猶患不得朝夕致敬也故凡水旱疾疫神臺上以便祈
禳已事乃歸其來久矣建炎中劇盜金虜繼至守奉像
設而駐師焉賊薄城若有禦之者最後望見二神黃衣
白馬往來雉堞間駭異而走紹興初始即臺立行祠淳
熙甲午易亭為殿又移慈濟院於臺西奉惠寂禪師即
神所敬者初寂歸老韶州將謝世神往訣別問豈無見
屬乎寂曰吾師靈祐禪師以正月八日逝于為山宜就
是日普設僧供神敬諾自後及期則彤蠶幽贊緇素咸
聚歲以為常既遷城中齋會滋盛遠人四集凌虛創閣
以待有衆慶元己未九月丁未融風為災一夕俱燼士

民謹曰此飛簷架空之咎也爭輦土石培展臺基首營
 正殿五間後列為仰二禪師暨王之父子又為堂以識
 參請設亭以備拜享別造齋閣于新址總用錢八百餘
 萬郡守李詵捐金穀倡之闔境爭趨和之武經郎趙伯
 壽鄉貢進士袁簡及益公震掌其事兵馬監押趙善漁
 董其役揆日於是年十月明年四月訖工因故人潘侃
 來求記予聞靜者為性動者為情性無有不善情則隨
 物應焉大而天地明而為人寂滅者佛變化者神雖曰
 殊塗然而仁民愛物之性善惡之情未嘗不均今
 二王既弭災捍患加惠斯民亦秉懿好德思媚神靈
 故是役也富者輸財壯者効勤自求多福用潰于成得
 非道一而已如吾儒所云者予咨爾袁人治情以禮養
 性以仁以稱天地神佛之心以還比屋可封之淳豈惟
 袁人四方其訓之五月旦

廬陵縣重修縣學記

聽訟理財根柢於縣令綱領於郡守人舉知之至於化
 民成俗守猶不敢專任况令乎此後世之通患而非古
 也三代盛時黨有庠遂有序州有長縣有正德行道藝
 以時書之當春秋世其制已廢吾夫子憂之平居每語
 其高弟曰君子學道則愛人小人學道則易使也其後

言偃宰武城果用弦歌而治夫君子學道固也小人亦與焉非縣令化民成俗之要歟更秦涉漢古制滋亡董仲舒獨能知之其言曰王者治天下以教化為大務立太學教於國設庠序化於邑又曰縣令民之師帥所謂教訓之官以德善化民者夫論庠序教訓而及於邑自夫子而後仲舒一人而已惜乎時君莫之能行迨本朝仁宗慶曆中始詔諸縣皆立學高宗中興申命於紹興十四年之春三代盛舉一旦遂復廬陵分治郡城多士所聚而縣庠介于官寺通衢之間無地可展知縣事羅烈雖竭力應詔然規模未備春秋蒸嘗釋奠後率附於

州將六十年今令宣教郎豫章黃疇若攝勇懷強容困抑姦待人以忠行己以潔得子路治蒲之政百里既安歲事仍豐首創祭器躬率諸生行上下禮次嚴像設葺殿廡新築戟甃階渠高其閘閤增舊三尺起嘉泰改元正月壬戌告成於四月己丑凡用工三千靡金錢三十萬學租舊六百斛養士不盈四十益以禪居院詭戶田一項為租六十斛然後歲計不乏而又精於問學勤于教導禮文師範兩得其宜於是職事許凌等求文為之記按唐循吏韋景駿傳神龍中嘗令肥鄉後為趙州長史道出舊治民爭奉酒食迎犒有小兒亦在中景駿曰

兒曹未生而吾去邑何故來對曰耆老言學廬館舍皆公所治意公古人幸親見之屬聞公府交薦黃君即仕於朝它日持節典藩道或由此父老子弟必將迎勞如景駿僕雖老矣倘見之乎是月甲午

分寧縣學山谷祠堂記

嘉泰元年秋奉議郎臨江徐筠孟堅宰分寧暮年矣專以儒術飾吏事每詣校宮必進諸生以學顧視山谷先生祠宇在講堂之左陋隘朽弊亟廣而新之傳像家廟惟肖釋奠服食則擇族老能文者營主祀事屬予識其成參考圖牒詳自唐正元十五年分武寧八鄉以名茲邑

西有幕阜山其高千丈廣袤百二十里修水北來東南經縣治凡六百餘里下入彭蠡此山川之最勝者也黃氏本金華人先生六世祖贍嘗為邑宰厥後奉親卜居沒則就葬歷三世家修水上宦學有聲而先生出焉此世家之可考者也夫惟山川炳靈世美交濟故其孝友之行追配古人瓌偉之文妙絕當世又得眉山蘇文忠公而師之陳張晁秦而友之是宜光顯于朝共振斯道乃或不然初坐眉山唱酬棲遲縣鎮後被史禍竄謫兩川晚以非辜長流嶺南遂隕其命中間翱翔館殿終六年年右史之拜復為韓川沮止其生不遇如此蓋人定

勝天也高宗中興恨不同時追贈直龍圖閣擢從弟叔
教為八坐寘甥徐俯於西府皆以先生之故宸奎天縱
至下取其筆法戒石刻銘徧于守令之庭李杜已遠遂
主詩社身後光榮乃至於此非天定勝人耶昔孔子在
魯：人指為東家立歷聘諸侯伐木削迹無所不有孰
知後世郡邑通祀南面巍然一履之微猶藏武庫聖人
尚爾先生其奚憾予既書其大畧又系以辭使遇祀事
而歌焉其詞曰嗟先生之致身何艱難而險阻猗先生
之沒世乃發揚而普詡歸高山與景行極幽遐而爭觀
微岌：乎當時詎煌：以終古又配祭其鄉社俶奉嘗

於新宇釀修水以為醪釣修魚而實俎擷白芽於雙井
粲浮甌之花乳尚來燕以來寧永範模乎故土九月十
日

玉和堂記

春為青陽夏為朱明秋為白藏冬為玄英四氣和謂之
玉燭此格言也今夫佳花美木在天壤間氣和而後生
人皆知春時為然不知和氣所鍾無時無花也老叟既
闢敞廬東為平園：西北隅隙地坦然乃距北垣五十
弓餘二肘為堂三間南直唐虞二典閣背為流盃亭其
深四丈二尺博三丈七尺崇二丈有奇敞扉而涼塞向

而燠可以納四時之和氣散植紅梅辛夷桃李梨杏海棠茶蘼紫荊丁香冠以牡丹芍藥此春景也前後兩沼碧蓮叢生東則紅芰彌望榴花萱草雜寘其間此夏景也巖桂拒霜橘柚蘭菊盛於秋江梅瑞香山茶水仙盛於冬時花略備矣至如佛桑躑躅山丹素馨末利之屬或盛或檻榮則列之悴則徹之而種植未歇也始造於慶元庚申十月戊辰八月丁未與客落其成共惟聖主在上衆賢和於朝萬物和於野遂使皞然一叟得佚老於和氣之內故榜其堂曰玉和志幸會云時嘉泰元年也

敬齋記

紹興庚午秋予與永新周正寬平一同預貢籍知其素慕王文正公之賢植三槐于庭築堂臨之厥後終於迪功郎監衡嶽廟蓄德積善敷遺嗣人其子尤字才卿即堂之陰架屋十楹廣二十尺榜曰敬齋致小雅必恭敬止之義自為說數百言大畧謂人之事天地事鬼神事父兄固不莊敬及處間燕或尊臨卑貴待賤未免安肆尤實懼焉願參前以自警夫惟存心如此義方之訓可知嘉泰辛酉仲子圭復以妙齡舉于鄉父子過予叙宗盟陳世契且求一言予告之曰六經辭雖多而指甚要

故中庸禮儀三百威儀三千而漢儒所記以曲禮為首
篇以毋不敬為首句此所謂禮之本也本立則禮無不
行亦猶詩三百而夫子蔽以思無邪之三語也尚何隱
顯高下之別哉請歸而刻之石臘月庚寅

太和縣龍洲書院記

西昌下臨贛江陳霸先入援梁室駐軍有龍躍之瑞事
見南史本朝開基之明年南唐知制誥徐鉉作白鶴觀
記謂江水北湊而東匯龍洲南峙而重復以是名洲蓋
亦久矣又有天柱一峯屹然其外勝槩殆冠茲邑初即
縣治之東築光華館以待過客已而遷驛快閣遂為權

酌之地今宰宣教郎趙汝暮決科為政綽有父風至而
歎曰天地之氣聚為山川山川之秀人實鍾之况父老
相傳洲過庭魁出豈以麴蘖之故易弦歌之樂耶乃起
嘉泰元年七月徹而新之疊石為基創屋二十楹列左
右生齋曰袞然曰卓爾白堂及門端正顯敞下逮庖湍
各得其所閱兩月工已訖告遂做潭之嶽麓衡之石鼓
南康軍之白鹿榜曰龍洲書院擇春秋補試前列者十
人居之而主以庠長於是縣學長諭貢士陳棟周有德
學賓陸本謁予以記或曰縣有學矣此非贅乎予曰三
代盛時自王畿達于六鄉六遂為學者二為序十二為

庠三百諸侯三鄉三遂庠序當半之家塾猶未論也太
和子男邦也畧考圖籍浮屠之居百區老子之宮亦十
五區而額存屋廢者不預焉昔歐陽文忠公著本論謂
三代之民不從事田畝則從事禮樂不在其家則在庠
序是以王者之政明聖人之教行雖有佛老無自而入
今也昔之庠序皆轉而為寺觀何不疑於彼而反疑於
此也幸賢令為之主盟使諸生得藏脩游息于斯未仕
則由六經而探賸聖人之教既仕則推所蘊以發明王
者之政復古之功權輿于茲豈但科舉得江山之助而
已二年六月既望

吉州通判廳記

郡丞秦官惟掌兵馬自漢迄唐其名不常曰別駕曰司
馬曰治中曰長史雖均號上佐其實從事之長耳故緹
油屏軾下與主簿同賜而州牧或得辟置間以處王子
及近臣之左降若起廢者其於政事罕嘗與聞邦國不
空之謠宜其寥々也藝祖皇帝創業之四年繼五代擾
攘藩鎮跋扈兵強民弱治少亂多之後首置諸州通判
不動聲色於朝廷之上而興利除害功徧天下是冬又
詔凡公事非守倅僉議連書勿行規模宏遠豈歷代明
君賢臣思慮所能及嗚呼盛哉吉大州也其為貳則在

唐顏魯公以謫至本朝向文簡公以德選其他名賢炳炳相望嘉泰二年五月朝請大夫開封鄭臨寔來適二千石缺併館郡組其家世之盛仕學之優施於有政見謂明敏初升聽事則支傾朽朽懼將壓為竹木瓦甍幸儲庭下君問緩故則曰卜未利也君曰覆壓之不虞陰陽之是拘其可乎是月庚申亟僦工歲事七月乙巳落成拓題名記示某曰公大父秦國公以宣和七年春居是官嘗行州事踰四考乃得代士民懷德固請家為舊廳載新是宜為記某追思始能言侍親于祖父母之側今七十有五年兼燕楚之城社致桑梓之恭敬安敢以老

諄荒唐為解抑嘗讀衛詩美文公營宮室曰得其時制百姓悅之今君思一日之葺破拘攣之議得其時也用成材仍舊貫加顯敞為其東故有風月軒又闢西偏以相映帶得其制也自是入儀天朝遺後人以安俾之交修郡政惠此千里仰稱藝祖設官之美意其本立矣因土木之工而紀歲月某請事其末云是年十月五日

汀州長汀縣社壇記

載芟春祈社稷良耜秋報也由都城達于郡邑古今一揆故壇壇有制牲幣有數蠹蕘備物酌獻以時守令躬行具存成憲粵自釋老教行神祠亦增雕墻峻宇殆徧

城郭一遇水旱官吏奔走祈禳之不暇於是五土五稷之壇誕寘遐僻寂寞之地頽垣敗壁蒲博所聚荒榛蔓草牛羊踐為二仲時至眈加雜葺例委行事於掾佐牲瘠酒酸酸簋簋弗虔姑應有司之文過是蕪廢如初承議即天台謝周卿來治長汀首致志為自邑徂壇崎嶇沮洳往來病之乃為相攸以直易迂甃為通衢二里而近繚以長垣總四十有三丈東為社壇崇三尺五寸廣丈有八尺附風師壇于其傍西為稷壇制與社等雷雨二壇對峙其側前闢門屋三間後創齋廬亦如之庀工以嘉泰二年閏臘之望閱月告成不遠千里以記為請予

聞子路使子羔為費宰曰有民人焉有社稷焉是固然矣繼以何必讀書然後為學夫子亟黜其言今君自大父以儒登科臨民有聲肆其先公克紹世美致位二府君復傳父祖之學為長于斯推仁心濟敏政治人事神益兩得之故書以告後之人毋俾或壞三年三月辛巳

終慕堂記

元祐名相忠肅劉公之曾孫諱荀字子卿博學篤志切問近思平居隆師親友著書累數萬言從宦則考古證今見諸行事故小試理財錢流地上出守邊城南北形勝盡在目中而於立朝事君講之尤詳向使得位與時

庶續先烈仕止二千石士大夫共惜之其子新長林簿
無愧既葬君清江之新城復取大孝終身慕父母之語
揭名塚舍之堂屢求一言或疑孟子章指為舜事親設
非追遠也予謂不然祭義因文王事死如事生反覆論
孝子之祭而其末曰立愛自親始又曰孝以事親順以
聽命是則人子慕親何間存歿故經云生事愛敬死事
哀戚生民之本盡矣死生之義備矣孝子之事親終矣
嘉泰三年三月

平園續稿卷第十九

終

平園續稿卷第二十

周益文忠公集六十

記三碑附

吉州錄參廳題名記

諸州錄事參軍於今為從八品掌郡獄及軍資市令之
政實曹掾之首富沙陳希黯以名父之子繼登儒科來
官廬陵謂職有崇卑題名不可無記乃起高宗中興距
今七十有八年得姓名二十七人求予一言將刻之石
夫才有能否其時之事聲實顯晦後乃見之希黯用志
亦遠矣予聞曹參在齊治道清靜比其去猶以毋擾獄
市屬後人督郵有司也清靜何居予請著其說假令罪

在甲乙枝蔓丙丁擾也科抑賈區強之貳價亦擾也惟
母縱故犯毋妄取舍使吏杜姦貪人安其業始可與言
齊相之意矣嘉泰三年四月望

敬思亭記

嘉泰三年三月乙酉登仕郎太和蕭知節母夫人唐氏
以疾終享年六十六十月丙午葬本縣高行鄉龍角
之原知節泣而請曰先人諱遵不幸早世吾母素知書
既戮力教知節以學劬躬立門戶輕財重義撫育宗族
凡知節得出入公卿之門皆母教也今因極之恩不可
報矣築亭塚舍取祭義生則敬養死則敬享思終身弗

辱之訓榜曰敬思願賜語以寵綏之子聞夫子論要道
至德一本於敬是以孝子之祭其立其進其薦其徹悉
以敬為主反是則為固為疏為不愛為教為忘本可謂
詳矣及子張乃一言以蔽之曰祭思敬蓋平居得於夫
子者如此予尚何云九月辛巳

筠州樂善書院記

舜命夔典樂首教胄子周大司樂治學政專合國之子
弟是時公卿大夫多出宗姓崇德象賢率于此乎取之
本朝至道元年以近屬繁衍初置學官於是教授之名
立迨咸平迄祥符南宮北宅復置侍教十歲已上並令

肄業治平初增小學教授十有二員此命名分職大畧也舊制七歲入小學能誦孝經論語升大學又能誦兩經善書札宗正以聞熙寧元祐並勅諸院立小學八歲至年十四者歲檢舉焉是時厥後其制益詳此進德修業次序也南渡以來杭越首置諸王宮大小學教授西外南外並立宗學人知為善之樂以蕩陵德者鮮矣今高安郡守王淹文正公旦六世諸孫也追惟文正被遇章聖徧歷要近與聞育才之本末思原德意不墜先烈乃與貳車玉牒希宰議即郡庠之側創樂善書院外設重門東西兩廡：各三齋中為講堂三間列直舍于後

廩庖器用備焉庀工嘉泰三年之季夏訖工於孟冬先下尊屬司選宗子幼而未命者以二十人為額既望帥郡僚延處六齋：各有名擇老成之士訓以經史教官總其課程別立一齋待不帥教者市田千畝用足歲計屬其記之嘗聞閔雖基王者之化其應見於麟趾雖繫周公實美文王其在大雅曰肆成人有德小子有造古之人無數譽髦斯士是又甚言文王遐不作人一視親疎可以傳無窮施罔極也共惟祖宗作成宗英越二百年聖王在御推廣家法公族振：髦士域：將同符于文王芻州復能助宣聖化無愧民之師帥是皆宜書故

樂為之記明年正月既望

杜氏潛光堂記

大畜之彖曰剛健篤實輝光日新其德洛誥曰惟公德明光于上下蓋德有小大光亦隨之其積在身其發在人士固有幽潛如韓退之所云者故四明理掾杜君諱襄字伯稱是也世居越之上虞以篤行著君苦心嗜學銳意事功紹興末北征條要務謁府帥湯岐公後帥史魏公二公大奇之交薦於朝再命以官嘗尉崇安力變不舉子之俗治獄至無一夫之冤遇大利害密禪其長罷行之陰德不可計妻張氏處為孝女嫁為孝婦相與

力教諸子思恭既擢第餘皆蹈義向方見推鄉評厥後合葬考妣於縣之葛仙鄉寶謨閣待制陸務觀為之銘思恭復即塋築堂務觀以潛光名之求記於予往者杜正獻公越人也歐陽子誌其墓曰春秋諸侯歷秦漢千有餘歲不絕世譜而唐盛時公卿家法杜氏獨存今務觀謂君本同譜牒中間失其世次為可惜也雖然左氏叙陳敬仲光遠而自它有耀又曰非此其身在其子孫惟君德克而實浮不耀其章幸哉有子亶：乎儒猷孜孜乎義方自宜立身揚名顯前人之光何待退之而後發亦豈必遠耀於他邦乎茲為肯堂也大矣嘉泰四年

二月望

筠州判官廳記

國家以民之休戚政之臧否寄二千石其設官有亞有旅亞者倅也位逼未免於嫌意不盡者多矣掾曹旅也分職以治各司其局而已若乃事無不預而非逼職未嘗分而情通惟幕職為然筠州判官王牒彥璋南夫弟兄競爽同取科第以嘉泰壬戌七月寔來持身正泣事明一郡嘉賴官廨在麗譙內蓋尚書郎趙不遜茂中營造于紹興之庚午踰五十年敝當改為前政周景南經始而不克至是太守王淹伯奮既給竹木又出羨錢四

十五萬米百斛俾南夫易而新之相其地形深總十餘丈博則加倍乃列堂與廳並南向廳為三間其後分東西二齋榜曰壺天者禮部侍郎倪思正甫吏隱時所題也堂為五間深明雅潔不侈不陋介於二者有古薌堂茂中為叢桂設也稍東面西有尚絅堂南夫所創也九月庀工閱月而成予愛李觀元賓記常州判官袁德師廳謂前軒翬飛竹欄鳳食蓋由郡守韋公遇袁以善袁報韋以誠遂躋登茲今筠守甚賢捐費不吝幕下又賢居之也安善遇誠報賓主兩得惠政加予千里豈有既乎姑徇其請為之記四年甲子二月望

台州仙居縣學記

孔堂高第猶分四科性與天道未嘗輕言世之學者乃欲德行言語政事文學兼而有之其不可得而聞者每求於議論之間往名是實非言出而躬不逮此今昔通患也古靈先生陳公諱襄字述古福州侯官人時方以雕篆為學獨與陳烈周希孟鄭穆倡道海濱鄉人化之號四先生皇祐中令台州之仙居篤意學校首為文勸人讀書次諭以禮義之俗又擇明經之士朝夕講說詢問大義間習程試高不躡等卑不流俗示之以方期造于道而進取亦在其中士民懷之奉祠今百五十

餘年嘉泰辛酉通直郎四明林岳來治茲邑歆慕前哲凡庠序堂廡門觀舉新之厥初祠宇卑下遷置中門之右極其嚴潔刻公遺文二十五卷得謝雨詩于斷碑增置集中學有射圃淪棄榛莽亦加葺葺別市民居創觀德亭總為錢二千百緡皆出節用籍贖田十八畝輟務場餘財月萬錢以贍給生員請尉簿嘉禾錢撫專主教導於是學職林宓呂咸陳穎不遠二千里以記為請夫教人必以聖人為師古靈學夫子者也林君希古靈者也學者誠能各因其材致弗怠尊所聞而行所知豈特無負賢令亦將無負先聖可不勉歟按國史古靈傳

惟載其宰河陽典數郡所至必務學校而今仙居則略之是尤不可以不書也四年甲子四月望

廣昌縣學記

盱江折臨川而為軍廣昌又折南豐而為邑其地極江西界接於閩疆秀民為多初立學在縣獄之右紹興十七年令承敷徙置縣南郡丞劉嶸為之記後五十餘年當嘉泰二年四月奉議郎曹進之來為宰謁先聖殿上漏旁穿兩廡欹側且非其地邑士胡巖老請改築于縣治之東止戈亭舊基諸生相攸僉謀為允於是進士揭英之子儼子儀三人輸財効力主其事而黃作舟作礪

首捐錢四十萬為之助士胥和之庀工癸亥之夏甲子春新學成培卑為高以避水潦雙溪夾流匯為大江面對羣峯宛如圖畫高明堅壯他邑鮮儷進之予門生也求記勤甚予聞有學校之教有學校之文昔夫子折衷六藝自虞至周凡學校之教之文散於詩書禮樂中故論語不復問答惟告門弟子曰入則孝出則弟謹而信汎愛衆而親仁教在其中矣行有餘力則以學文：在其中矣本朝開設學校復帝王之盛雖碩儒名卿布於中外而士之月書季考惟在舉業故時文無慮三變始因唐舊專用詞賦或曰雕篆無益也於是經義行焉專

門一律又以為病而大學中庸之說出時論愈高行之愈難為師儒者既用此為去取士亦以此應之殆非國家攷求賢之本意也上方會其有極歸其有極士當是訓是行一變而至于道以副教育則所謂文將不勝其用矣于科舉乎何有進之衡州耒陽人淳熙辛丑登科既視事金芝產解中嘉禾生於野為政亦可知矣四年五月日

撫州學記

晉唐以來撫守多名臣至本朝則儒宗鉅公相繼而生學校之盛固不待言歲久或敝：又圖新理也雖然郡

守主盟為易教官任責也難慶元二年豫章胡君元衡來臨師席文風既振復懷永圖乃大議葺治適學糧贏錢百二十萬太守陳侯研首捐千緡常平使者王君容及後守曾侯楷各助十之三漕憲繼之總錢又百三十萬米不在焉以六月甲寅興工明年八月訖事凡大成殿御書閣講堂倉廩皆飾其舊內外門墻廊廡及正錄職事之位東西序之六齋文昌之軒庖湑之所悉鼎新之或請記其成太守曰教官力也弗許教官曰此二千石功也當書會入官上庠亦復不果今數年矣先日學正鄉貢進士嚴滋以書遺某前不求文教官謙也歲月

雖久公論故存敢敬以請昔孟子論傳道之序由堯舜
至湯文皆五百餘歲由文王至孔子適及其期故曰文
王既沒文不在茲乎蓋自任也惜乎無時無位不得見
諸行事退修六藝以傳萬世今學者幸居學校讀六藝
之書旦旦而來望數仞之墻盍興及肩之歎既升其堂
盍想聞金石絲竹之音仰之彌高鑽之彌堅瞻之在前
忽焉在後又當希顏子苦孔之卓夫如是晝而思之夜
復思之則於道也其庶矣乎墨池文祥姑存故事足矣
嘉泰四年六月

廬陵縣學三忠堂記

文章天下之公器萬世不可得而私也節義天下之大
閑萬世不可得而踰也古為江西上郡自皇朝逮今二
百餘年兼是二者得三公焉曰歐陽公修以六經粹然
之文崇雅黜浮儒術復明遂以忠言直道輔佐三朝士
大夫翕然尊之天子從而謚曰文忠莫不以為然南渡
捨攘右相杜克擁衆臣虜金陵守陳邦光就降惟通判
楊邦乂戟手罵賊視死如歸國勢凜凜士大夫復翕然
尊之天子從而褒贈之賜謚曰忠襄則又莫不以為然
時宰議禮衆論詢為一編脩官胡銓毅然上書乞斬
相叅虜使三綱五常賴以不墜士大夫復翕然尊之厥

後天子從而褒贈賜以忠簡之謚則又莫不以為然是
 之謂三忠雖然此邦非無宰相如劉沆冲之在朝嘗力
 薦文忠留置翰苑又引富文忠公弼共政今姓名著在
 勲臣之令而謚則未聞子瑾孫倜俱為侍制迄不能請
 矧被遇之從臣乎夫然後知節以壹惠天子猶不敢專
 亦必士大夫翕然尊之乃可得耳廬陵宰趙汝厦即縣
 庠立三忠祠歲時率諸生祀焉魏：堂：衮服有章揭
 日月而行學者固仰其煒煌若夫百世之下聞清風而
 興起得無慕休烈揚顯光者耶汝厦用意遠矣嘉泰四
 年八月日

碑文

永豐縣旌忠廟碑

高宗皇帝中興之二三年歲在己酉金虜分道入寇江浙
 大擾十一月隆祐皇太后自洪上顛護衛將杜彥揚臯
 當時誤以世雄奏乃其字也道叛屠撫之崇仁縣遂犯吉之永豐知
 縣事左承議郎宗室訓之字誨道素懷忠憤有為國捐
 軀之志至是率尉修職即陳自仁拒戰境上分民兵為
 三一繞賊後一據地利誘以羸卒賊遇伏而敗他盜蟻
 附鵠張尉死之侯力不支轉鬪入郭罵賊遇害年四十
 四賊視防守營柵歎服而去邑免焚蕩士民獲全不可

計人：德侯奉其柩葬太和縣瀘源鄉又附祠城隍水
旱疾疫禱焉明年詔贈朝散郎加直祕閣官其後兩人
自仁亦贈通直郎官一子同立傳國史又之二孫彥搆
彥權皆踐世科歷內外任使慶元五年彥搆以九江郡
丞銜擢省謁祠墓始從父老歐陽昌等得侯死所即邑
東藥師院隙地創廟三間設侯及夫人喻氏像尉與享
焉廊廡門闥嚴潔相稱以九月興工六年二月邑官致
祭落其成郡守趙善錄既助工費復上其事於漕：雷
滾下樂安丞吳魯卿新淦主簿梁季安繼來覈實俱謂
侯節義顯著禱祈輒驗實有功于民嘉泰元年太常擬

賜廟額旌忠六月壬寅制曰可彥搆等請文刻麗牲之
碑乃為作迎送詞歌以祀焉其詞曰

忠死為神兮前言孔彰我侯兵解兮上征帝傍民懷
德惠兮姓名愈芳天子有命兮典祀舊疆新宮翼：
兮像設堂：帝意若曰民不忘汝：豈忘往其廟食
從巫陽春秋致享禮有常牲牢潔肥奠椒觴坎：伐
鼓舞洋洋：神具醉止欣樂康時節謁帝奏祺祥雨暘
以時豐稻粱厲鬼驅除絕寇攘思江湯：兮與神之
績彌遠而彌長三年二月辛丑

在法神有功者初賜廟額次加侯爵此碑稱侯張

本也初侯之亡安撫使朱丞相勝非擢太和土官
泗州文學蕭瓌集民兵來邑定亂瓌因收恤侯家
葬侯瀘源以其子世崧娶侯長女後七年喻夫人
卒遂合葬焉侯之孫間來展墓瓌姪孫登仕即知
節寔為東道主廟成復為刻碑益其家素尚義云
某題

平園續稿卷第二十終

平園續稿卷第二十一

周益文忠公集六十一

神道碑一

龍圖閣學士左通奉大夫致仕贈少師謚忠簡

張公闡神道碑 紹熙五年

紹興元年二月丙戌詔以多難未彌人才為急其復秘
書省置官屬當是時高宗方馬上治天下乃肇復文館
收召名勝儲以待用君子是以知中興之必可冀也時
范丞相宗尹實當國而秦丞相檜初拜叅知政事逮十
年春秦雖專國柄然以與聞初議猶未敢進非其人惟
永嘉張忠簡公以端醇修潔用給事中林待聘薦召對

召試入省凡五年同僚或自臺察驟用或由著作為左
右史其下亦不失尚書郎而相國兄梓子熺又相繼為
之長他人附麗不暇公獨介然其間秦知公久次喜論
事一日微諷公謂當入臺公迎拒之坐是報罷閒廢十
有五年了無愠色秦薨公亦不求知於人二十九年始
以御史臺薦為檢法官班序更出正字下恂：百僚底
人為公太息會對便殿論事鯁挺擢吏部員外郎壽皇
初開建王府高選講讀官朝論舉屬公遂改祠部郎中
兼贊讀而直講則史丞相浩也三十二年六月己巳王
為皇太子升少宗正兼右諭德俄內禪攝二冬卿未幾

直講大用公雍容從臣之末泊如也隆興初元落權字
歲中進長本部上方銳意恢復而在廷議論不一公每
陳正心誠意修改事攘夷狄之說上亦虛懷聽納每事
咨訪使公少卑之執政可立致會江淮都督府結局和
議已成公堅求去上不能奪自壯至老大節益如此可
謂始終全德矣公諱闡字大猷温州永嘉縣人曾祖恭
祖積父贈中奉大夫忱皆積善樂施公幼夢人大書闡
字曰以是名爾中奉異之力勉公學未冠由舍選貢京
師中宣和六年進士第調嚴州兵曹掾兼治右獄州將欲
戮土豪付公鞠之公謂罪不至死卒請如律人嘉其有

守建炎登極循修職卽丁父憂紹興改元免喪以從政
卽為慶州學教授叅政李公回帥江西辟置幕中四
年叅政席公益帥湖南又辟公幹辦公事洞庭群盜熾
張公畫策造戰艦訓水軍賊勢以衰諸司交薦改秩吏
部引歲月失通理沮之公求監南嶽廟以歸連教授鄂
州台州既賜對首言金人歸我關中願固守以蔽巴蜀
圖中原次論監司郡守舉官之弊又乞嚴禁遏糴濟江
浙水患皆契上意命試學士院遂除秘書省正字輪對
論三事其一請廣人才任將相練士卒則徽宗梓宮可
還母后淵聖可歸母專屈已和戎使權不在我二曰臣

比自溫歷處婺浚旬再值雨雹麥秀者偃桑萌者落盡
恐懼修省以召和氣其三論官冗曰兵火後縣不滿千
戶設官乃十餘人州不滿萬戶而官至百餘人場務及
兵官率十員無學校而置教官無軍士而置將領駐泊
鈐轄之屬及員外置者不在焉昔漢光武併省四百餘
縣吏員十置其一唐憲宗用李吉甫言省冗員八百吏
千四百漢唐中興宜以為法上獎諭曰非卿不聞此在
職滿歲改左宣教卽十二年遷校書卽兼益王府教授
公自以儲才之地無力可陳惟國家大利害可因事納
忠時諸大將恃功邀爵賞有過則姑息又兵布于外而

禁衛單寡公上疏極論之厥後稍進退諸將召諸道兵補三衙闕額往：符公言明年以祕書郎兼國史院檢討官請通好高麗西夏訶北虜之勢明詔大臣廣求人才上皆嘉納又明年駕幸祕書省新例遷一官自是免去踰年主管台州崇道觀秩滿添差通判泉州代還改衢州未上省罷二十五年冬上躬攬萬幾起提舉兩浙路市舶居二年乃為臺屬升即闡入王府稍嚮於用三十一年四月御批兩傷蠶麥盜賊間發令侍從臺諫條具消彌之術公適輪對謂講和以來竭民力奉驕虜人不堪命強遣中原歸正人怨恨日深監司郡守不按法

貪贓州縣被害放積欠有名無實二稅先期追擾商賈苦於重征能革數弊災異消盜賊彌矣又言完顏亮積粟聚兵意在南寇乞守要害防海道巴蜀淮襄不可無良將督視不可無大帥上曰卿言深中時病惟遣歸正人誓書所載卿未知爾已而亮果遣使持嫚書來朝廷始為戰守備略如公策八月遷將作監是冬虜騎臨江公因轉對請增治江戍兵大修諸郡之備濟師京西淮東牽制虜軍明年夏進宗正少卿壽皇登極擢權工部侍郎兼侍講賜服金紫以隨龍恩遷七官遂輔左通議大夫入謝言將以敗為捷冒受爵秩諸州廂禁軍因覃

需鼓譟希厚賞不可不正其罪上為次第施行虜亮死
新主復求和朝廷議再遣使詔略曰敵人索舊禮從之
則不忍屈不從邊患未已納中原歸正之人東南力不
能給否則絕向化之心宰執侍從臺諫其詳議以聞公
言選將練兵名分可正江淮授田遺民可招疊：數百
言是冬給禮侍從臺諫條具時務公上十事一曰強國
勢二曰革苟且三曰重臺諫四曰明賞罰五曰信號令
六曰抑奔競七曰嚴軍政八曰戢貪吏九曰節財用十
曰禁科歛當是時應詔數十人惟公與國子司業王十
朋指陳實事斥言權倖無所回隱明日上召兩人對內

殿大加稱賞賜酒食面授御書各一軸隆興元年正月
真拜工部侍郎公奏臣去冬乞守禦兩淮陛下謂立春
行之夏秋當畢脩今其時矣面陳三策移都督府於維
揚增修淮上城郭優恤山水寨民兵及死事之家以勸
來者上曰今江淮事盡付張浚朕倚之為長城會督府
請受蕭琦等降上召問公：疾不能入奏請受其降俄
報王師收復靈壁虹縣公慮大將李顯忠邵宏淵深入
無援奏乞益兵殿後已而王師果失利衆論遂歸罪於
戰公奏陛下出師受降是也諸將違節度且無援而敗
當矯前失安可遽沮銳氣上命益出御前器甲付諸軍

親禮勞張公軍聲復振時數易臺諫公力言之會太白
晝見詔近臣條闕政公謂比年災異數見去秋七月温
台颶風壞廬舍以萬計二浙飛蝗蔽野今歲夏秋雨淫
水溢米直翔湧太陽薄蝕星緯復爾當思應以實不以
文乃者言路輕易出令不謹君子未進小人未退給禮
條弊政而無所更革減否監司守臣而無所升黜文具
如此致變固宜至如近則荆襄江淮守禦缺然遠則蜀
道連歲出師凋瘵已甚陛下方馳騁毬馬日引狼子野
心之人周旋禁御垂象安得不再三示警耶疏入上召
公以擊毬非朕所好邊陲未靖欲便習鞍馬耳公因言

真宗仁宗增置諫員今纔一二人非所以廣聰明上曰
臺諫好名如某人但欲得直聲而去公曰唐德宗疑姜
公輔為賣直陸贄切諫願陛下深以為鑒上再三嘉獎
虜復求成上與公議公曰彼欲和畏我耶愛我耶直款
我耳力陳六害不可許上曰朕意亦然姑隨宜應之上
又記公賣直之語謂胡銓亦及此朕非拒諫者辨是非
耳公曰聖度當如天奈何與臣下爭名上忻然曰卿言
是也頃之除權工部尚書兼侍讀十一月宰執奏今秋
金國副元帥訖名列志寧以書論通好朝廷遣使臣盧
仲賢報之所論三大事正國書歲幣如數皆定不疑惟

唐鄧海泗未決將遣王之望龍大淵通問而衆言紛
不已乞以當和與否遣使與否禮數後先土疆取與大
詢侍從臺諫擇其善者從之詔於後省限一日集議於
是吏部尚書凌景夏戶部尚書韓仲通權吏部侍郎余
時言刑部侍郎路彬同一議禮部侍郎黃中兵部侍郎
金安節同一議侍御史周操右正言陳良翰為一議給
事中錢周材起居舍人馬騏為一議起居郎胡銓監察
御史尹樞閣安中各自言之其說人不同公獨謂不
與四州乃可通和議論先定乃可遣使今彼為客我為
主我以仁義撫天下彼以殘酷虐吾民觀虜勢已衰何

必先示以弱朝論避之初上用真宗故事命經筵官二
員通宿學士院朝夕宣召商確古今諮訪政事公入對
尤數知無不言屢引疾丐間上曰朕所以知外事皆賴
尚書相從久忍言去耶二年四月公請益力上不得已
除顯謨閣直學士提舉江州太平興國宮陞辭上問所
欲言公奏許和則忘祖宗之讐棄四郡失中原心遣歸
正人傷忠義之氣惟陛下毋忘老臣平昔之言其指時
事尤諄切上曰卿姑暫還鄉秋涼復召卿矣加賜金犀
帶特許佩魚公既退賦詩云八請犯天顏今朝出漢闕
渾如倦飛鳥日暮傍巢還到家踰月而病以龍圖閣學

士左通奉大夫致仕七月二十六日薨訃聞特贈端明
殿學士恩數視簽書樞密院賻銀絹二百疋兩享年七
十有四乾道元年十一月十四日葬本縣建牙鄉瞿溪
之原中奉公墓側初公素樂其山水將歸老焉葬從公
志也淳熙十年特賜謚忠簡累贈少師娶盧氏先公八
年卒贈越國夫人四子伯桂國學生早死仲梓朝奉大
夫新知通州叔椿朝散大夫江西轉運判官季樗朝請
郎主管建寧府武夷山冲佑觀一女嫁奉議郎兩浙轉
運司主管文字盧珉孫煥承議郎新權通判平江府燁
宣義郎克兩浙西路安撫司幹辦公事燿通仕郎燧承

奉郎新監建康府戶部大軍庫門嬉文林郎新福州羅
源縣主簿餘未命名孫女二人迪功郎新監行在省倉
中界吳瑾從事郎新臨江軍判官潘檜其壻也曾孫垓
修職郎新福州長溪縣主簿次尚幼公莊重出於天性
誠信濟以學力在王郎讀資治通鑑至修身治國必反
復誦說壽皇每嘉納暇日賜禮札和詩恩意綢繆人謂公
必輔初政而公歸志浩然善類迄今以為恨平生行事
悉筆于冊五十餘年不少廢文體粹然詩尤清遠鄉人
子弟多求公紀其父兄行實諸子類成文集若干卷藩
邸聖德事迹十卷經筵講義故事若干篇奏議若干卷

并藏于家公之為臺法也其與館職間遇公朝士之家
公徑趨下坐客頗不安予謂公即祕書越二十年乃館
中先進當序齒如例眾以為允公初貳冬官某忝起居
即追班從駕容踵公武情好孚洽今轉運君以書來
云先君道同志合惟王公十朋胡忠簡公銓王公嘗為
行狀許志墓而不果胡公亦下世成遺志者惟執事耳
某不敢辭乃為銘曰

煌：精金 百鍊不變 矯：勁松 歲寒乃見

有美張公 積善自躬 正直靖共 一其初終

紹興盛際 公在館閣 尊厥德性 恥要人爵

龍躍于淵 翼之天飛 政路砥如 公背而馳

上知公誠 士服公識 信道而行 何徇何激

官非不崇 壽非不隆 用有未盡 人思無窮

三溪釣徒 公昔自謂 樂哉斯立 尚愜公志

資政殿大學士贈銀青光祿大夫范公 成大神

道碑 慶元：年

吳郡范氏自文正公起孤童事仁宗皇帝當慶曆癸未
入參大政後百三十有六年公復參孝宗皇帝政事維
譜牒不通俱望高平派南陽之順陽蓋鳩夷子苗裔也
今為郡之吳縣人公諱成大字至能曾祖澤贈太子少

保妣昌元郡夫人夏氏祖師尹贈太子少傅妣咸安郡夫人陸氏咸寧郡夫人蔣氏考雱終左奉議郎祕書郎贈少師母秦國夫人蔡氏蒲陽忠惠公之孫而潞忠烈公外孫也公在懷抱已識屏間字少師力教之年十二徧讀經史十四能文詞是歲秦國薨明年少師薨公號然哀慕十年不出竭力嫁二妹無科舉意欲買山無貲取唐人只在此山中之語自號此山居士又慕元魯山為人一字幼元生友御史王公彥光勉之曰子之先君期爾祿仕志可違乎因課以舉業遂中紹興二十四年進士第調徽州司戶叅軍歷三守李植潘莘洪文惠公

李御下嚴獨霽威待公會遷提點坑冶辟公幹辦公事不就潘格郊赦不弛諸軍糧欠衆言紛：將校告急於公：徑為免符白守行之乃定洪公博洽精明每以訟牒付公必問一牒幾人姓名云何公由此究心熟吏事洪公喜日與公商確今古常曰吾視君齒必至兩地其自愛用舉主陞從事郎三十二年入監行在太平惠民和劑局堂吏勾藥不獲以朝旨下所隸太府蒐細故杖吏逞憾公白戶部侍郎汪公應辰杖太府吏已能大其官矣壽皇受禪命宰臣編類高宗聖政隆興元年四月以公為檢討官又兼勅令所近世局務無脩書者人以

公為宜詔百官條時弊公舉十事極論文具非所以為國執政竒其才二年四月除樞密院編修官居數月自以銓格改左宣教即時館職有定員有詔公與王徹候闕召試十二月鄭升之不試先除牽聯併除公秘書省正字公不可必試策而後就乾道元年三月升校書郎六月兼國史院編修官十一月遷著作佐郎二年二月除尚書吏部員外郎言者以不先攝為超遷宰相曰著廷間擢左右史顧不可為即耶九月言者罷乃主管台州崇道觀三年十二月起知處州陞對論力之所及有三一曰日力寸陰是也二曰國力資用是也三曰人力思

慮智術所及者是也三者有限今盡以虛文耗之公前應詔上封及試策反復論此至是方見上力以為言上曰卿能激昂如此朕當行之四年八月至郡松陽民爭役公曉之曰吾聞東陽縣有率錢助役者前婺守吳侯義之為易鄉名揭碑褒勸爾與之隣獨無愧乎民既感謝則推廣其制諭鄉人視貧富輸金買田擇信義之家掌其事儲歲入助當役者命曰義役仍許自第名次有司勿預數月間人皆樂從一縣二十五都悉以辨告甲乙相推遠至二十年諸邑爭做之處多山田梁天監中唐南二司馬作通濟堰于松陽遂昌之間激溪水四十

里外溉田二十萬畝溪遠田高堰壞已五十年公尋故迹議伐大木橫壅溪流度水與田平即循溪疊石岸引水行其中置四十九閘以節啟閉上原用足乃及其中次及其下而堰可復議定官為雇工運石命其傍食利戶各發丁壯分畫界至以五年正月同日興工四月而成水大至如初議適公被召躬往勞工父老驩呼曰堰成公忍去我耶公曰吾能經始安能保其無壞為立唐南廟作堰規刻石廟中畫給左右山林為修堰備至今蒙其利公入對因及義役上大喜頒其法諸路公曰此可助法非以為法顧守令行之何如耳初上命宰相陳

正獻公擇文士掌內制正獻薦知遂寧府張震及公至是上曰卿文學詞翰宜直禁林公懲前遷即致謗懇辭退復告執政會上目疾不御朝夕之內殿奏事上首及公除目正獻道公意上曰不專在內制正要士人宿直備顧問乃除禮部員外郎兼崇政殿說書上令更加清職遂兼國史院編脩官會從兄成象為工部郎官公援故事乞班其下從之內直數宣對嘗諭公朕治心養性以求知道公曰知道莫如堯舜禹湯文武周孔其靜而聖存心養性是也動而王治天下國家是也漢唐之君功業固有之道統則無傳焉上嘉獎數四十二月擢起

居舍人兼侍講直前謝上曰卿閱深博約故有此除又兼實錄院檢討官公奏獄案淹延當貸者多庾死乞嚴程限於是自三省至大理皆定經由之日公先嘗論二浙丁錢至是詔通減之乾道令以絹計贓估價頗輕論罪過重公奏承平時絹不足千錢而估價通倍紹興三年遞增五分為錢三千足今絹益貴當倍時值上驚曰是陷民深文也遂增為四千而刑輕矣後又奏勤政而不省其成否治具雖多何益古者君臣相戒既曰率作興事又曰屢省乃成二典之治如斯而已上喜曰卿言切治道已退復召公曰為朕尋繹經傳與此論協者

條上公即摘取書易左傳國語孟荀等書上之初大臣與上謀移侍衛馬軍屯金陵示將進取先遣使請祖宗陵寢河南故地又隆興再講和名體雖正失定受書之禮上常悔之六年五月遷公起居郎假資政殿大學士左太中大夫醴泉觀使兼侍讀丹陽郡開國公充金國祈請國信使為二事也上語公曰朕以卿器宇不群親加選擇聞外議洵：官屬皆憚行有諸公曰無故遣泛使近於求繫不戮則執臣已立後仍區處家事為不還計心甚安之上曰朕不敗盟發兵何至害卿嚙雪餐糗或有之不欲明言恐負卿耳國書專求陵寢而命公自

及受書事公乞併載書中朝廷不從公遂行虜遣吏部
郎中田彥臯侍御史元顏溫迓客彥臯文儒深敬慕公
至求中饋傲之抵燕山公知虜法嚴附請不可達密草
奏具言他日北使至欲令親王受書其詞云：懷之入
覲初跪進國書陳誼忼慨虜君臣方傾聽公隨奏曰兩
朝既為叔姪而受書之禮未稱昨嘗附元顏仲季若川
等口陳久未得報臣有奏劄在此措筭出而執之金主
大駭厲聲謂其宣徽副使韓綱曰有請當語館伴此豈
獻書啟處耶自來使者未嘗敢爾連呼綽起綱皇恐以
筭來綽公：不為動再奏云奏不達歸必死寧死于此

金主欲起左右掖之坐又厲聲云教拜了去綱復以筭
抑公拜公跪如故金主曰何不拜公曰此奏得達當下
殿百拜以謝金主乃令納館伴處公即袖下殿望殿上
臣僚往來紛然後聞太子欲殺公其兄越王不可而止
頃之引見如常儀既歸館伴果宣旨取奏去是日綱押
宴謂公早來殿上甚忠勤皇帝嘉歎云可以激勵兩朝
臣子後數日朝辭金主令其臣傳諭云盟好已定汝國
乃以帛書密與夏國任德敬結約此何理也公答以界
外奸細偽為之俄館伴持蜀中蠟書來指印文示公：
曰御寶可偽况印乎德敬者夏王外祖號任令公再世

用事欲篡其國事敗族誅而四川宣撫司嘗與通問為
夏人所獲致之虜廷云十月公還金主答書有曰抑聞
附請之辭欲變受書之禮出於率易要以必從上於是
知公竭節盡忠獎勞之餘有終始保全語除中書舍人
同修國史及實錄院同修撰賜紫章服副使以下皆遷
兩官惟公不預蓋大臣不樂公嘗言其輕信西夏也上
勵精政事患風俗委靡書崔寔政論賜輔臣公講禮記
天子不合圍諸侯不掩群上曰此成湯祝罔意也公遂
奏德莫大於好生陛下得之矣乃者御書政論意在飭
紀綱振積弊而近日大理議刑遞加一等此非以嚴致

平乃酷也上大喜曰卿知言聞臨安已觀望行事矣講
退侍講張君栻謂公深得納約自牖之義右史莫君濟
曰當書之記注後數日公進故事復申其說自公使北
狂生上書迎合恢復事補官十餘人公奏倖門不可開
繼此臣必繳奏上曰誠然書已滿屋朕皆弗省公每事
正掾大率類此七年以知閤門事兼樞密都承旨張說
簽書院事公當制知空言不可回明日袖詞頭納上前
且曰閤門官日引班駟寘二府正如州郡以典謁吏
為倖貳觀聽謂何明日說罷後月餘公求去上曰卿言
引班事甚當朕方聽言納諫乃欲去耶公自是數有繳

奏會召宋貺公又論之章不下尋除集英殿脩撰知靜江府廣西經畧安撫使明年春說竟拜簽樞九年公始赴鎮廣西荒遠窘匱承平時仰湖南北及封樁錢七十餘萬緡裨歲計此外惟恃鹽貨其法屢變大要官船為便建炎後中原士族富家避地輻湊嘗一行客販其後客皆北歸隣道歲給亦停稍許折苗招糶旋以病民而罷諸郡專藉運鹽之利漕司取十六以其四充郡計已復盡取之於是屬州有增價抑配之弊詔復行鈔鹽漕司拘鈔錢均給所部而錢不時至守令束手無措極邊如邕州至經年無吏俸禁軍逃亡不捕公入境曰利害

有大於此乎日夜討論連奏疏數千言大畧謂法久或弊揀之在人誠能裁漕司強取之數以寬郡縣則科抑可禁不在改法上亟從之後明年廣州一鹽商上書乞復客販吏部侍郎詹君儀之以為然宰相入其說請下詔示必行大出朝廷錢銀助之人多以為非屢下有司議皆謂公前疏不可易久之卒如其舊交趾間進馴象紹興二十六年有大僚為帥自詣驛禮其使至是遣尹子思來公曰吾經略諸蠻陪臣安得抗禮受其庭叅而犒之遂為定制舊法馬以四赤三寸為限詔加四寸已上公謂互市四十年不宜驟改論奏再三仍條馬改革

獎事皆報可有沿邊巡檢常恭者誘南丹酋莫延甚開
路市馬直達帥司自以為功張說猶在樞庭引恭見上
詔委李宗彥措置馬事公奏南丹越宜州已非法今併
舍帥司邊防壞矣疏恭罪惡密遣人擒以歸會說去位
流恭江州公以溪洞徭人出沒不時請選官團結省民
毋得外交寇至勿俟官兵徑禦之次及熟徭在省地者
亦為保伍明開博易之路毋得私易又遣人深入蠻境
諭以約束自是無敢犯法興安縣界盜傷人公密設方
略掩捕適中秋同諸司泛舟賞月命取大卮酌酒置案
間提刑鄭丙問故公笑曰欲飲至爾俄岸上謹諫乃將

官沙世堅執賊首來即以卮酒飲之諸司駭服瘴鄉多
旅樞公擇城北坑冶故墟為塚瘞之揭名氏於傍微者
別為二大塚凡仕族落南使自言給歸資至今以為法
淳熙元年十月除敷文閣待制四川制置使知成都府
稍鑿夔峽山路以避湍險人以為便會復置宣撫使以
命樞臣改公成都路制置使未幾廢宣撫司公復專四
路之寄初及境言吐蕃南詔昔為唐患今幸瓜分西南
無警二百年近者雅州碉門蠻入寇敗官軍乾道九年
吐蕃青羗兩犯黎州而奴兒結蕃列等尤桀黠輕視中
國臣當內教將兵外修堡寨仍講明寨丁教閱團結之

法使人自為戰三者非才不可上手扎獎勵賜度牒錢四十萬緡公日夜閱士製器甲督邊郡次第行之時摘兵赴帥司按其精粗以黎為要地奏置路分都監增五寨籍少壯五千為戰兵經理歲餘凡吐蕃擾邊徑路十有八悉築堡置戍奴兒結借諸部兵二千扣安靜寨公發飛山軍千人赴之料其三日必遁戒勿與爭已而果然有白水寨王文才私取蠻女常蕩之寇邊公重賞檄群蠻使相疑貳俄蕃牙擒文才以獻公命即黎州教場斬之兵威大震于是專意恤民矣初蜀之財用止以贍蜀自屯大兵始竭民力公私俱困公畧計成都在城建

炎三年酒課歲終四萬緡有奇後增十倍縣鎮酒稅場店民戶買撲課利總十五萬有奇後累至四十萬他郡可知即具以聞詔歲減四十八萬緡公隨額重輕躬為裁定蜀人呼舞即寺觀為感恩祝聖道場公後言和糴之害凡西兵十萬歲用米一百四十七萬斛兌買省計及營田之外闕五十二萬斛括興元階成西和鳳文龍等州民戶家業而均科之每石予錢引四道有半其二分析茶實給三引耗費斛面不與焉詔與總領李繁議繁審計本所饋遺乾沒歲約百萬隱而不言獨奏乞朝廷降本招糴執政怒詔公劾繁違制不同議公遣人語

繫：感懼始出羨數是歲遂以此錢所在招糴其後上
疑歲歉或妨闕公謂脫不得已權科一年歲豐如故不
猶愈於常擾民乎上曰善令每歲降指揮而科糴遂止
文州蕃部間擾邊公奏乞預為文告崑强者討擊之善
良者撫摩之使知畏慕不可專示弱啟侮上以公深知
事體即日施行蜀用陝西舊法料簡強壯民丁三萬寓
之於農號曰義士以待緩急歲久監司郡守多雜役之
都統司又令守關隘烽燧且乞與大軍更戍公力言其
不可詔遵舊法諸路提刑歲俟朝命踈決詔到率以秋
公請五月舉行解試取士以四月五日鎖院後十日引

試公請避盛暑速先一月皆著為令高宗慶壽赦舉引
年致仕而才力不衰者公奏名士樊漢廣年五十九孫
松壽六十六先已納祿尤宜旌異詔令赴闕二人俱不
至遂除職賜服蜀士歸心焉凡人才可用者公悉羅致
幕下用其所長不以小節拘之其傑然者則露章以薦
往：光顯于朝或至二府三年春公大病求歸上令先
進敷文閣直學士明日乃下詔命公列上兵民十五事
上曰范某已病尚為國遠慮可趣其來公疾愈而行送
客數百里不忍別後公謝病吳門往來者伺候謁舍或
經月必一見乃去其得士心如此十一月入對除權禮

部尚書賜上方珍劑五年正月知貢舉開院侍御史奉
詔啟封吏承例牒拆號官而不云何官御史疑薄已有
後言公尋兼直學士院四月以中大夫參知政事又權
監修國史日曆終兩月前御史亟論公：即出門明日
宣押奏事引咎而已上曰朕不忘卿數月訊至卿家矣
除資政殿學士知婺州公請以本官奉祠詔如所乞提
舉臨安府洞霄宮九月果有使來傳詔撫問密賜累珠
金鼎金盒寶香其中六年二月魏王薨於明州起公代
之兼沿海制置使公未復職過闕依前執政例中使郊
勞賜銀盒茶藥仍許服毬文帶特御後殿引見賜茶上

曰蜀人思鄉如慈親故付卿以海道公奏張津伯圭魏
王皆國懿親時節奉海物於兩宮臣外朝臣也不敢効
尤上命停貢而罷進奉局又乞權閣魏王移用諸司錢
數萬緡寬民力詔除之七年二月除端明殿學士三月
改帥江東兼行宮留守奏事畢陸辭詔明日辭選德殿
近例賜宰執酒止傳觴至是特設几開宴酒三行命侍
過西小軒曰此朕清坐處也再坐上曰勸卿一盃且有
以為侑公飲訖二內侍捧縑素來上有石湖二大字御
墨尚濕公拜賜奉觴進謝上為滿引復紬御書蘇軾詩
一軸以賜自未至酉乃罷石湖在平江盤門西南十里

蓋太湖之派范蠡所從入五湖者始吳夫差築姑蘇前
後臺相距半里為城三重宴遊忘歸其前有溪今號越
來溪勾踐由此攻吳瀕溪築城與吳人夾水相持遺址
儼然公隨高下為亭觀植花竹蓮芰湖山勝絕繪圖以
傳至是攜宸奎過家刻之四月開府金陵適歲旱公招
徠商賈捐閣夏稅請于上得軍儲二十萬石賑饑民苗
額十七萬斛是年蠲三之二而五邑受粟總四萬五千
四百餘戶無流徙者盜發柴溝去城二十里又劫江賊
徐五稱靜江大將軍公皆設策捕獲在鎮二年以餘財
代輸下戶秋苗及丁錢一年九年公以積勤浸苦頭眩

自夏徂秋五上章求間上不得已進資政殿學士再領
洞霄里居七年十六年十一月起知福州引疾固辭詔
令奏事又辭上先遣醫官張廣卿傳旨灼艾既對勞公
曰卿南至桂廣北使幽燕西入巴蜀東薄鄴海可謂賢
勞宜其多疾袖丹砂以賜時皇太子參決庶務公得見
東宮坐論治道移時太子諭公不敢暇逸日惟讀書作
字公曰石湖已拜宸翰有壽櫟堂願得寶書太子欣然
曰是莊子操社事耶公既出闕上復賜藥甚厚至家又
遣使賜御書蘇轍詩二首太子亦送壽櫟堂三大字俄
壽皇內禪公行至婺州以腹疾力請奉祠從之壽康皇

帝初政特詔求言公疏乞述重華以廣孝治執仁術以守家法堅國體以定規模節經費以蘇民力精覘謀以應事機審選任以求將材修堡障以固西南議益筴以安二廣嚴錢禁以權官會廣屯田以實邊儲皆當世要務紹熙三年加資政殿大學士知太平州公辭數四優詔不允下車踰月幼女將有行而逝公追悼切至遂請納祿復得洞霄而歸先以石湖稍遠不能日涉即城居之南別營一圃閱杜光庭神仙傳記胡六子自崑山泛海至范村遇陶朱公事大喜曰此吾里吾宗故事不可失也題曰范村刻兩朝賜書于堂上榜曰重奎其北又

葺古桃花塢往來其間四年九月公病疾語門人曰吾本不待年告老今不濟矣亟為我剡奏詔下而公以是月五日薨積官至通議大夫爵自吳縣開國男累封吳郡公實邑三千二百戶實封一百戶享年六十有八遣使奏聞贈銀青光祿大夫自公曾祖葬吳縣至德鄉上沙之赤山少師嘗戒子姪他日葬我母遠先塋後葬稍南小丘公嘗營壽藏百步間以十二月十三日歸窆妻和義郡夫人魏氏前公幾月薨至是祔焉夫人承直郎信臣女紹興參知政事敏肅公之猶子敏肅知公深一見以遠大期之二子萃承務郎茲承奉郎女長適從事

卽新監行在車輅院張蒙次封孺人卽沒於當塗者公
天性孝友少師工部如嚴師愛二弟教而撫之待成績
尤至今為朝請卽通判建康府成已前卒郊恩官群從
弟姪五人歷典名藩所至禮賢下士仁民愛物凡可興
利除害不顧難易必為之樂善不厭於同僚舊友喜道
其所長不欲聞人過去思遺愛所在歌舞之公天資俊
明輔以博學文章瞻麗清逸自成一家尤工詩大篇短
章傳播四方初做王筠一官一集後自裒次為石湖集
一百三十六卷別著吳郡志五十卷使北有攬轡錄入
粵有駮鴛錄桂海虞衡志出蜀有吳船錄各一卷公蔡

氏所自出故書法兼真行草之妙人爭藏之壽皇尤愛
賞相與極論古今翰墨數被賜予因虜使為館伴王侍
郎拒詳言公奉使時事益簡上心以公羸疾賜藥無虛
歲至口授藥引修養秘訣親厚非群臣比輔政既日淺
每出鎮輒以病免故雖大用而未盡議者惜焉某與公
齊年御史王公予外舅也以是與公善壬辰春自春官
去朝過平江遊城西諸山公訪余靈巖同宿石湖望夜
小舟共載湖心風露浩然嘗有六十掛冠之約其後或
同朝或相遇於外每以未踐言為恨今公云亡二子以
主管吏部架閣文字龔頤正行狀來請銘其敢以老詩

辭銘曰

應龍將翔 瀚以雲霧 聖君勃興 賚以丞輔

伊昔重華 治謹厥 洵美范公 心期致主

皇初好文 公筆燕許 皇念典學 公業馬褚

皇資專對 公節騫武 皇命征鎮 公猷方虎

他人偏長 公力交舉 經營四方 不遑啟處

衮職有關 帝命公補 終六浹旬 誰實公沮

豈無藩維 每以疾阻 時非不逢 施迄未普

刻銘幽墟 尚詔終古

平園續稿卷第二十一終

平園續稿卷第二十二

周益文忠公集六十二

神道碑二

中散大夫賜紫金魚袋周公 樞 神道碑 慶元二年

公諱樞字仲應姓周氏世為濟南臨邑人自公高祖徙家縣之曲隄曾祖登大理寺丞贈通議大夫祖點治平四年進士終左朝議大夫贈通議大夫父淵右通直郎贈紫金光祿大夫公少穎悟長以經術入太學嘗與太常丞吳棫同舍棫以憂去舉篋鑰付公曰有用任君啟之比吳免喪封識如故母趙氏濮安懿王之姪孫以郊恩奏公承節即連丁內外艱躬負土營葬服除試換迪

功卽調單州刑曹教與守爭疑獄靖康二年州募僚屬
奉表勸進康王往。移疾公獨請行建炎初繳趣淮浙
綱運展轉兵間至山陽值劇賊攻城郡就委公守禦卒
以無虞士民德之請公行郡事公引劍誓不可乃止單
恩循修職卽改太平州獄掾疏理繫囚時具藥餌三年
無瘳死者以從政卽監臨安府都稅院府尹才之命攝
錢唐縣時北邊罷兵營繕日興錢唐當治郊壇籍田秘
書省不勞而辦賞循承直卽諸司交薦紹興十六年改
右宣教卽知常州宜興丞久之易宰平江之常熟治劇
沛然有餘力十九年郊恩賜緋魚袋轉通直卽知紹興

府上虞縣積勞遷朝奉卽俄監鎮江府權貨務都茶場
累賞轉朝請大夫通判建康府帥方侍郎滋史侍郎正
志舉府事委公轉運韓尚書元吉趙少卿彥端選公權
知廣德軍乾道三年也最後葉丞相衡總領財賦以公
名聞召赴都堂審察擢知撫州與奏事稱旨會臣僚言
郡守年七十者與宮觀三省類十一人姓名以進詔特
留三人公與李衡柳楹也侍御史李處全又薦公風力
可治煩於是改知吉州七年賜服金紫吉大州事十倍
他郡公處之整暇適二漕不成甲將以治辦薦公乙怒
反加摭摭公乃求主管台州崇道觀而去起為沿海制

置司叅議官叅政范公成大守四明雅器公軍事多諮
烏秩滿主管武夷山冲佑觀遂致其仕疊遇德壽宮慶
壽恩轉中散大夫公之守吉也某自禮部侍郎奉祠歸
里公年七十有五每燕集達旦無倦色予猶未五十莫
能陪也其後十五年公年九十携其兒孫訪予於相府
飲食笑語如初寓居秀州海鹽縣既歸值夏秋暑甚得
瘡痢整衣危坐而逝實淳熙十四年十一月四日公詳
練通敏外和而內有守不可干以私善筆札喜談論隆
親急故無不得其懽心娶安陽王氏封宜人供備庫使
知恩州贈少師諱復之孫朝請大夫開封府司刑曹事

諱觀之季女而某先妣秦國夫人同堂妹也勤儉有容
德婦公五十四年內助為多先八年卒公因卜地於縣
之永安湖西石帆山葬焉至是乃同穴蓋明年二月六
日也二子迪功即湖州司理叅軍大年前卒季子從事
即徽州歙縣主簿億年廉謹世其家二女長適張調再
適文林即福州錄事叅軍俞世昌次適鄉貢進士木曇
孫男六人升南華字頤正師中鼎新父吉女六人曾孫
男四人女二人億年數來請銘不得而辭銘曰

儒雅視其身公勤達于政不才能加諸人不以嗜
德伐其性一謙有終吉五福考終命之二者於公信

而有證矣

中大夫贈特進蔡公神道碑 紹興二年

仁宗朝蔡忠惠公昌言直道文章政事廷臣鮮出其右當是時由侍從登二府者非歷言路則入翰林非尹開封則領三司四者公徧為之垂大用而仁宗上僊犒軍賚予修奉昭陵橫費錯出公之處益閒暇中外歎服會間言請去未幾即世士大夫至今以為恨其葬也惟幼子旻在仕至宣義郎開封府上曹贈少傅先娶賈氏翰林侍讀學士點之女追封吳國夫人再娶潞國文忠烈公之女追封越國夫人是生三子長直龍圖閣佃次徽

猷閣侍制佃季特進也諱伸字伸道三歲而孤鞠於文氏稍長與侍制從龍圖受業名聲日昭時號三蔡釋褐將仕即辟雍正出為京東提舉學事司幹當公事入太學辟雍皆為博士銓法改宣德郎調知濰州北海縣徙江淮發運司幹當公事通判徐州禁卒謀夜半舉火作亂公微聞之部分他營密為之備仍戒譙樓故緩更籌戌夜方擊三鼓卒舉火則黎明既愆期眾無應者相率逃去追捕盡擒之微公一郡殆矣會北虜陷汴都康王開大元帥府公上謁軍門遂留幕下王即位巡淮甸及南渡公皆從行為頓遞官數被嘉獎命為張循王神武

右軍叅贊軍事出奇應變與有戰多戚方張守忠轉掠江浙間公招以書皆來降蓋公嘗挺身入賊壘開心見誠人故信之知楚州趙立公倅徐時部曲也自詭專治兵以郡印遜公朝廷命公通判州事公力辭改通判真州冬大雪火焚千餘家老稚啼號填道公處以官舍寺觀又發常平米賑給守不可公自任責上書待罪詔釋之擢知滁州真民挽留曰非吾父吾屬死矣至滁幾年秦丞相當國知公與舊相趙忠簡公副樞王敏節公厚罷郡主管台州崇道觀紹興九年北虜歸我河南起知徐州公受命亟行虜尋渝盟改知德安府又改知和州

再求祠以歸久之為浙東安撫使司叅謀官秩滿復提舉崇道觀公負文武器略善騎射力挽二石弓見謂時才而事機不契退居常州浮湛里閭四奉外祠未始以窮達介意喜為歌詩字畫得家法性通音律每與賓客酒酣慷慨浩歌長嘯遂至於老輕財重義濟人之急家無餘貲遇大禮官伯氏二孫載咸報教育之德人益賢之二十六年十月庚寅以疾卒明年正月壬辰葬武進縣懷德南鄉潭墅之原享年六十有九積官左中大夫賜服金紫爵建寧縣開國男食邑三百戶累贈特進娶刑部侍郎商守拙之女追封濟南郡夫人四子長湍承

事即通判鎮江府後公二十年卒次沈試戶部尚書又後四年卒次流從事即監潭州南嶽廟次溟承直即新貴州軍事推官六女武翼即知楚州辛堅之從政即徽州黟縣令祖嗣昌通直即知明州奉化縣向士邁朝奉大夫知潮州潘淵明承議即主管台州崇道觀張克成進士劉澂其婿也孫九人戡今為中大夫克右文殿脩撰知隆興府戩朝奉大夫通判潭州幾承議即知臨安府富陽縣戩承事即戩奉議即新兩浙轉運司幹辦公事戩戎未仕武戩早卒曾孫十人康文林即監建康府提領戶部贍軍酒庫庸承事即新監淮西總領所惠民

局唐承事即新監鎮江府大軍倉廉將仕即廌庚餘未名按蔡氏世家興化軍之仙遊縣自公曾祖贈刑部侍郎琇而上隱居不耀忠惠公拔起田間未冠擢甲科其弟高亦中景祐進士第不幸早世歐陽文忠公銘而悲之逮崇寧二年龍圖廷試第一宰相京舊通譜牒請降第二大觀三年政和五年待制與公相繼登科自以家世名儒而龍圖及從元祐諸公遊耻附宗衮常遠絕之因星變疏宰相非其人坐責監當其後秦丞相與公有同舍同年之好復不肯曲意干進秦薨而公亦病矣高宗一日與知臨安府榮薨歷數霸府舊人問公安在薨

以公病棘奏上嗟惜久之其三世隱顯本末如此蓋忠
惠公蓄德燾後施及諸孫暨公善積慶餘克有良子歷
官八坐被遇孝宗追謚曾門振宣幽光再傳至右文優
踐世出入三朝由戶部侍郎分鎮江西蔡氏之興殆未
艾也公既沒四十年而墓道之碑未刻右文君以予周
行舊交使來請銘乃為銘曰

天之於人 報於可必 凡後之昌 繇身之詘
惟忠惠公 當用而抑 肆其三孫 競爽鼎立
季也允文 而又武力 曾是國器 胡寧家食
遺子若孫 奮取豐積 勿替引之 永世無斁

龍圖閣學士宣奉大夫贈特進程公大昌神道

碑慶元二年

故吏部尚書程公以龍圖閣學士就第踰年而卒其子
準等持兵部侍郎楊公大法所狀行實屬某以銘予與
公同年進士數嘗同僚厚我莫如公知公莫如我其何
敢辭恭惟孝宗皇帝聖學高妙勵精政事尤有知人之
明惟公歷兩省六曹以該洽直諒見知相與論道統評
政體在廷少比公亦忘身徇國思為朝廷植悠久之計
其在外則心乎愛民長慮却顧未嘗便文自營士大夫
皆以不大用為恨及事壽康皇帝興念舊僚疊加恩禮

而左右之裏言公亦老矣無意仕進得謝于家盡發所
蘊著書立言啟迪後生蓋其自幼至老機祥卜祝無所
信玩好技藝無所嗜惟通經評史考古驗今一事未詳
一理未窮弗措也其始終大槩如此若乃爵里議論則
可一二數矣公諱大昌字泰之按程氏其先出自重黎
周有休父封於程地在閩中子孫散居西北有開府儀
同三司靈洗者效節蕭梁著功於陳封忠壯公南史以
新安為新海寧人即今徽州休寧也厥後或北歸或遂
留故公為休寧曾祖晟娶洪氏祖士彥娶金氏父畎累
贈正奉大夫妣淑人陳氏世積善尚義攷：教子至公

穎悟殊常見十歲能為文紹興癸亥重立太學年甫冠
矣一試即預選學官爭為延譽二十一年登進士第一
左迪功郎主吳縣簿丁正奉憂服除獻文於朝宰府奇
之二十六年除太平州教授明年召為太學正三十年
詔館職必試乃除初召朱熹載等再召劉儀鳳等皆辭
上命宰執擇人不許辭以公應詔仍諭上旨遂除秘書
省正字改左宣教郎三十二年六月孝宗受禪擢著作
佐郎初政銳意事功命令四出貴近或預密議公因輪
對及之尋命百官條弊事公又極言漢石顯知元帝信
己先請夜開宮門之詔他日故投夜還稱詔啟閤或言

顯矯制帝笑以前詔示之自是顯真矯制人不復言國
 朝命令必由三省防此弊也請自今被御前直降文書
 皆申省審奏乃得行以合祖宗之規以防右顯之奸又
 論去歲元顏亮入寇無一士死守而兵將至今策勳未
 已惟李寶提膠西虞允文戰采石實屠亮之階今寶罷
 兵允文守夔此公論所為不平也上聽其言三皇子就
 傳遊擇官僚九月以公為尚書駕部員外郎兼恭王府
 贊讀又兼兵部郎官隆興元年兼慶王府直講十二月
 丁母憂乾道二年春服闋召為考功員外郎六月復兼
 恭邸贊讀八月遷選國子司業三年十二月兼權禮部侍郎

一時文柄舉屬公其成就人才不可計凡今老師宿儒
 多公門生也五年正月兼權直學士院宣對選德殿上
 曰朕治道不進如何公知上志在恢復迎合者多即奏
 陛下勤儉過古帝王北虜自通和知尊導中國不可謂無
 效但當求賢納諫使政事日修則大有為之業在其中
 不必用迎合之言求奇策以幸速成又言淮上築城太多緩
 急何人可守臣謂設險莫如練卒練卒則在選將上深
 然之後數日再召對上曰卿前言朕儉是也獨病風俗
 太奢用度不足今早與大臣議立法以止之公奏居室
 衣服吉凶之禮皆由有著令要在上之人持久以化之耳

上又問卿更有何事為朕言之公曰事有大小有先後今四方獄案必經聖覽大臣因是亦困省閩何暇議大事急先務乎往陛下嘗增左右司為四員若漸復減員分以委之中書之務清矣後數年迄如公言八月除直龍圖閣江東轉運副使蓋公求試民事故以卿部寵之公引嫌改浙東提點刑獄越帥多大僚適歲豐酒稅溢額漕臺不敢問乘公攝帥遣其屬挾朝命括羨財且將增額公力拒之曰某寧罪去不可增也越人迄今德公七年復徙江東運副詔勿引嫌公猶不自安踰年乞祠就徙江西路公曰可以興利除害行吾志矣九年歲儉

出錢十萬餘緣代輸贛吉臨江南安四郡五等夏稅折帛逼饑民為盜之原又遷吉州造船塲於臺治以省費革弊凡古舊欠皆捐之清江縣有破坑桐塘兩堰堤江四十里護田三千七百頃居陸地又三百頃堰壞四十年歲罹水患公力復其舊又奏漕臣遇代積累欠數病州縣乞行蠲削淳熙元年各詔可凡乾道七年八年諸路欠稅賦丁役及他錢物併除之由公一言上恩及天下矣歲滿再任進告不下宰執問其故上曰程大昌職事修舉自合加職乃陞祕閣修撰二年四月召為秘書少監九月兼權中書舍人六和塔僧以鎮潮為功求內

降給賜所置田產仍免科徭公奏二稅外和預買折帛正額外科借皆科也保正長身丁雜役皆徭也僧寺既違法置田復移科徭於民奈何許之况自紹興二十二年修塔之後潮果不蓄岸乎御前置忠銳忠武軍以浙西路鈐轄李師古兼統制帶御器械戚世明兼訓練援例增請給公執不可其命俱寢俄兼宗政殿說書三年四月除權刑部侍郎升侍講五月兼國子祭酒公言辟以止辟未聞縱有罪為仁也今四方讞獄例擬貸死臣謂有司當守法人主察其可貸則貸之如此則法伸乎下仁歸乎上矣上以為然舊法宰執初除轉廳皆有

給賜減半其後太尉使相三少而上往取旨視樞密使都官用例浸失法意公請自侍從而執政自執政而相則為初除法當全與餘為轉廳皆減其半遂為定制上知公特立不避怨茲欲用之四年八月兼給事中江陵統制官率逢原縱部曲毆百姓守帥辛棄疾謂曲在軍人坐徙豫章公極論不可上曰朕治軍民一體逢原已削兩官降本軍副將矣康與之在紹興時以談諧進後坐事長流廣南至是有與為地刊除舊犯還其資歷公封還勅黃上喜曰待遷擢卿其益盡心毋避忌十月落權字五年正月同知禮部貢舉御製原道辨尋易名

三教論獨公與聞之六月進吏部右選侍郎兼同修國史舊小使臣注令尉若監鎮兼煙火者驗老病而已公以其親民面令讀律且詰其大指不通者輒罷遣八月兼權尚書六年夏正除權吏部尚書公遇事啟請知無不言如論軍中強壯子弟及西北伉健之人不可輕聽離軍禁衛不以膂力進今率三年輒補外官用違所長宜留寘三衙又欲酌紹興舊制命諸軍挽強轉資稍示勸誘又請究歸正偽冒裁減添差以寬州郡面奏堂白累萬餘言會舉行中外更迭之制公力請卽是冬除敷文閣直學士知泉州陞辭上諭曰凡有見悉奏來自南

渡後泉為台信建昌邵武四郡代輸銀二萬四千兩諸縣並緣苛歛預借公條便民事具言本末有司持之未下明年首為民代輸一年且乞禁絕後日預借又蠲前歲秋苗之未輸者八年春汀賊沈師作過詔併勸其徒公請罪止渠魁赦其脅從仍許徒中相糺可使亡命解散不然數州據亂是堅其附賊也宰相然公言奏行之是冬沈師獨興死黨竄伏漳州山谷間距城百餘里州有左翼軍戍將蕭統領者卷甲赴之逮夜力疲搏賊不勝死焉閩中大震漕檄左翼統制裴師武出兵師武置司在泉謂帥符未下不敢擅興公手書趣之曰事急矣

有如帥責君可持吾書自解又取前得釋脅從之旨散
榜以間其黨師武至漳群情頓安捕獲謀者十餘曹皆
積藏兵器謀刻日縱火為賊內應微公先事從權趣師
武行漳且屠吳太守劉立義郡人今左司郎中鄭公顯
馳書謝公曰城邑獲全公之賜也終更提舉江州太平
興國宮十三年秋起知建寧府十四年復提舉南京鴻
慶宮自公為郎首侍壽康於王邸多所寵益其後間謁
東宮必款語移時嘗用家人禮許見今上及公主親取
寶器酌酒飲公受禫之初與宮僚一等推恩紹熙元年
加寶文閣直學士旋知明州示將復用遽以祠歸四年

超進龍圖閣直學士明年請老進本閣學士致仕皆非
常典也慶元改元十一月甲申以疾不起享年七十三
積官先^宣奉大夫爵新安郡開國公食邑二千一百戶食
實封一百戶贈特進公自宦遊去鄉里樂吳興溪山之
勝而卜居焉晚得安吉縣梅谿鄉即閤山規營塋域未
成而卒淑人陳氏公母之從兄女生百日值方臘亂父
母携匿谷中祝曰兒若貴勿啼自是悄然既長歸公事
舅姑以孝聞生諸子躬自鞠育公嗜書未嘗省家事實
祭孔時淑人力也年七十六遭公喪謂諸子曰吾得從
而父足矣病不服藥後公四十七日安然而逝遂合葬

為二年四月辛酉也四男準朝散郎新通判太平州奉
 早世阜朝奉郎知上元縣覃宣教郎新浙西茶鹽司幹
 辦公事三女適承直郎監行在文思院都門鄭汝止次
 適奉議郎新知湖州康武縣丁大聲季早亡孫三人端
 復登仕郎端節端履以遺澤補官女三人公有文集若
 千卷別著禹貢論五十二篇辨江河淮濟漢弱水黑水
 甚詳凡諸儒捨經泥傳注失禹本旨者一皆正之又為
 山川地理圖端明殿學士汪公應辰博洽重許可讀之
 大歎服謂不可及公在講筵遂以進御天語嘉獎今行
 於世別有演蕃露六卷攷古編易老通言易原雍錄四
 可謂博學篤志者矣銘曰
 浩：萬古 孰知其津 擾：萬生 孰致其身
 偉歟程公 絕類離倫 氣以直養 業以勤精
 士之指南 國之寶臣 其在兩禁 昌言復君
 使于四方 仁心庇民 胡不弼諧 迄其經綸
 歸而著書 極道之貞 既設言立 庶幾不泯
 自歛而湖 肇自于今 有式新阡 尚考斯銘
 書各十卷北邊備對六卷書譜二十卷取五十八篇互
 相發明篇為一論抉隱正為尤有功於學者嗚呼若公

平園續稿卷第二十二 終

平園續稿卷第二十三

周益文忠公集六十三

神道碑三

朝散郎克集英殿修撰林公光朝神道碑慶元三年

子貢問鄉人皆好之何如孔子答以不如鄉人之善者
 好之孟子告齊宣王以諸大夫曰賢為未可必國人皆
 曰賢然後察而用之是二者古今觀人之要術於吾艾
 軒猶信初予與著作佐郎劉夙賓之為同年進士後識
 故相陳正獻公皆莆人也賓之博洽剛介正獻道德隆
 重其不輕許可則均每論其鄉之人物賓之曰艾軒吾
 師也正獻曰艾軒吾友也後予官太學會諸生則亦人

人推林艾軒蓋其博學篤志手不釋卷出入起居必中
規矩事親孝御下仁行已恭執事敬勇於義審於思善
并美具宜為當世所宗然未嘗著書惟口授學者使之
心通理解常曰道之全體存乎太虛六經既發明之後
世注解固已支離若復增加道愈遠矣文辭古雅不事
雕鏤如清廟朱絃可一倡三歎也五十方奏名則有命
焉於時朋游若門弟子宦達已多交賀于朝區區一第
何足為重欲其因仕行道耳夫未仕而鄉人之善者以
為師友通國之人皆謂之賢既仕則又為之喜由是天
子察而用焉茲豈聲音笑貌所能致哉誠之不可揜也

如此艾軒公自號也隆興元年調袁州司戶叅軍未上
召對改左承奉郎知永福縣大臣論薦不已召試館職
乾道五年七月遂入為秘書省正事兼國史編修實錄
檢討官六年佐著作兼司勳司封郎官七年遷著作郎
兼郎禮部八年進國子司業兼皇太子侍讀史職如故
九年請外以直顯謨閣提點廣西刑獄淳熙改元易使
東路二年茶寇自荆湖剽江西薄嶺南其鋒銳甚公自
將郡兵檄摧鋒統制路海本路鈐轄黃進各以其軍分
控要害會有詔徙公轉運副使公謂賊勢方張留屯不
去督二將遮擊俘獲相繼賊驚懼宵遁上聞之喜曰林

其儒生乃知兵也加直寶文閣明年召拜國子祭酒兼
太子左諭德四年二月乙亥駕幸國子監命講中庸上
大稱善面賜金紫己丑除中書舍人為誥有古風坐繳
奏新御史除目改權工部侍郎請外以朝散郎充集英
殿修撰知婺州引疾提舉江州太平興國宮五年五月
六日卒此其出處大畧也公諱光朝字謙之世為興化
軍莆田人曾祖南一祖繁父勉累贈奉議郎母恭人曾
氏享年六十有五是歲十月二十日葬本縣麥堆原之
北娶徐氏封恭人六子今存者宜季能季宜季迪功郎
福州福清縣主簿一女適太學內舍生南若礪猶子成

季力學而賢為公作家傳正獻公又作祠堂記凡公行
誼閎闊已詳而其子復以先志來求銘墓墜之碑予念
昔在兩省公適登第典貳秘書公來著庭佐春官公為
郎掌史事公為僚晚忝宮端同事壽康皇帝前後五聯
官曹大而道德性命之理無不講內而閨門寢食之私
無不及讀書未達賴公析疑屬文未工咨公指瑕平居
相愛殆同天倫公之本末皆親見熟察非但傳聞而已
是宜為銘其銘曰

尚賢好修 志誰不勤 汲古纂言 業誰不精
孰如林公 好學而醇 所持者正 所勉者誠

身猶布衣 人曰公卿 年未強仕 人曰老成
時雨之教 其化也深 水上之風 渙然有文
瞻彼莆中 冠蓋如雲 祭公于社 過者必欽

資政殿大學士毘陵侯贈太保周簡惠公神道

碑 慶元四年

高宗皇帝足馬渡江中興矣祚其豐功盛德固不容盡
述竊窺大要以仰成宰輔信用臺諫為本三十六年間
命相不一自今觀之激士氣復故疆張丞相浚之心也
固根本俟機會趙丞相鼎之志也專持國柄一意和好
者秦丞相檜也三相所主雖不同其人才進退政事弛

張是非得失公論各不可揜至于身任安危則一而已
當是時言路固多名臣其視力輕重而為向背亦或有
之惟毗陵周簡惠公以乙卯歲趙張並相之日四月入
臺十月進殿中侍御史在職僅兩月言事至三十章大
抵謂自治其國乃能成功今外有強敵內有群盜不可
事虛文貽實禍歷條時政二十餘事指宰相不任責上
變色曰趙鼎張浚肯任事湏假之權奈何遽以小事形
迹之公徐奏陛下有過尚望大臣盡忠今臣一及大臣
便為形迹使彼過而不改罪戾日深非所以保全之也
上改容曰此論甚奇最後連章極論趙子直語侵趙公

又論張公大舉北伐繫國存亡坐是不得其言而去迨
秦公獨相意公必憾趙再拔公入臺公語人曰元鎮已
貽某固不言雖門下客亦不及也一日內降差除四人
公言願陛下以仁祖為法大臣以杜衍為法又歷疏三
大弊秦怒甚不數月改左史因是流落于外十六七年
秦薨始為禁從席未暖復去國孝宗即位公與張燾辛
次膺任古首被召初對有繩愆糾繆之諭會上以張公
為樞密使督帥江淮銳意恢復而公素不以亟戰為然
命佐夏官明年六月符離退師乃超拜政府其後湯丞
相思退與張公並相或戰或和多取決于上而其賓客

議論間失之偏公始終守自治之說是則曰是非則曰
非不將不迎不諂不許表裏洞達無一毫之偽又明年
四月張公罷十一月湯公亦罷上再起陳丞相康伯虜
已約和國論始定時公在政府一年有半矣因墜馬敗
面傷手力請去上不得已久乃從之其立朝本末如此
所謂非苟知之亦允蹈之者歟公諱葵字立義常州宜
興縣人曾祖密贈太子太保祖璟贈少保父裕朝奉郎
致仕賜緋魚袋贈少師妣秦國夫人王氏公少力學自
鄉校移籍京師兩學傳誦其文宣和六年廷試以曆數
為問公既詳對又為說曰聖人兼天地之職一物不遂

必任其責凡易之大衍內經之五運六氣書之閏月定
四時老氏一生二：生三：生萬物皆當裁成輔相以
實之然後可以和同天人之際考官嗟賞擢寘甲科調
廣德軍司刑曹事靖康覃恩循修職郎用舉主陞文林
郎注徽州軍事推官車駕移蹕臨安諸軍交馳境上守
死倅易公與判官攝行郡事隨機應變千里帖然初大
觀間諸郡增賦物帛其後赦書已蠲減而漕臣便文復
取於民公白新守力止之訖公去乃增如故薦章交上
改通直郎臨安府學教授未赴吏部侍郎陳與義密
薦公遂召試館職將試復引對上曰從官多說卿端人

正士面除監察御史紹興五年也尋克省試叅詳官開
院適輪對論內外兵勢上密以措畫與公議信嚮方深
既為副端論事不合徙司農少卿四求去皆不允兩召
至都堂諭旨二相云以言求去非朝廷美事公曰某離
言路半年自以親老家貧請外耳乃除直秘閣知信州
屢展戍期趙公罷張公當國陳公與義執政改河南提
點刑獄公事以遠求易浙西又避本貫易江東四歲四
易地迄未嘗至八年冬和議已定公復被召論為國若
有道戰則勝守則固和則久不然三者在人不在我矣
九年二月除太常少卿五月再為殿中既不合會傳某

人賜出身除兩府者公又將論之携疏至殿幕改起居
卽有詔侍從兩省薦西北人才公同給事中劄一止薦
呂廣問廣問叅政李光客也擬試館職秦不可謁告不
入言者論罷李併謂公受其風指十二月黜主管洪州
玉隆觀十年郊恩復直秘閣十二年春起知湖州十三年
正月移平江府復以郊恩賜服緋魚北方初修聘勅使
駱驛公不為禮又積與轉運議論不協共劾公設宴菲
薄十四年二月落職主管台州崇道觀屏居鄉閭二親
益老家益貧憂患連年人不能堪公獨安之二十五年
十二月復舊職知紹興府二十六年正月過闕除權尚

書禮部侍郎賜紫章服兼國子祭酒又兼權給事中言
路忌之三月出知信州太學生列狀留公不報居數月
復罷郡二十八年起知撫州引道疾作改提舉江州太
平興國宮十月直龍圖閣知太平州水壞圩岸公大加
修治凡百二十里傍郡諸圩皆沒惟當塗歲熟市河久
堙雨暘交病公下令城中家出一夫官給之食併力浚
導公私便之三十年八月進集英殿修撰尋移婺州加
敷文閣待制當江上用師調度繁興不擾而辦三十二
年七月除兵部侍郎時孝宗初政增置講官九月首命
公兼侍講積官左朝散大夫隆興元年同知貢舉戶部

周益公集 卷之三
闕官兼權侍郎上數批問錢穀出入公奏陛下勞心庶務日有諮詢若出人意表足以聳動觀聽今皆微文細故此必有小人乘間獻忠欲售其私不可不察蓋指龍大淵曾覲也上色為動自元顏亮斃襄雖兩軍相持而移文議和不絕張公自督府來朝密為上言虜失泗州其偽官蒲察久安大周仁寄治虹縣懼罪皆欲來歸願遣軍渡淮赴之此恢復之機也二相皆不與聞公請對謂不可輕舉累數千言上唯五月李顯忠將騎兵邵宏淵步兵共十餘萬取虹縣下靈壁既克宿州二帥始不協虜兵擊顯忠軍宏淵不肯援幸勝負相當至暮

我師入城明日虜亦解去金帛山積顯忠不以犒軍衆怒而潰敗書聞上思公言以左中大夫叅知政事正謝畢朝德壽宮門無宿衛廷無閣門公乞輪差從之故事初拜相賜銀絹二千疋兩執政半之辭則減半例自行首司申御藥院取旨公命勿申遂已每便朝二府先共呈機速房事既畢宰相兼樞密使自與其二次呈西府文書叅政稍退一日西府擬元居實浙西總管上連問如何相樞皆無語上顧公問可否公前奏曰是人頃為御前買北貨乾沒萬計公論必不可上乃却其除日後數日公留身上曰昨居實差遣不同議耶公曰此西府

事臣不與也是時衰雖主和而其右丞相兼都元帥僕散忠義左副元帥訖石列志寧握兵淮北專任邊防嘗以書達三省密院大略謂方議遣使遽乘不備攻我符離無乃為將臣所誤妄要功利乎今治兵決在農隙舊疆歲幣如約則止眾謂彼不以興師歸過朝廷及督府反為我設詞罪將臣其欲和可見矣上令答書差右宣教郎假樞密院計議官盧仲賢右宣義郎假將作監主簿李栻充通書官栻以妹為虜王妃辭行命都轄官王柝代之十月末仲賢等與虜帥議定為叔姪國上曰虜能以太上為兄朕所深喜詔遣從臣為通問使而以右

宣義郎胡昉假樞密院編修官脩武郎楊由義假樞密院管幹公事充國信所審議官臺諫交章言議和太速公與陳湯二相乞令侍從臺諫集議眾益洶：諸公待罪乞罷不許公獨留身固請上曰卿何請之力也對曰臣誤蒙知遇欲為陛下正綱紀今不可得而正也上曰何為不可公曰政出於一則綱紀可正今朝廷督府左右前後之臣皆欲自行其言此臣欲去者一也臣初為言官晚忝侍從事有不可大即奏論小則堂白言雖不從臣責塞矣固無愧於心也出而為州事苟難行反覆論之不從則委曲行之使百姓不至受弊亦可無愧於

心也惟預政以來每與宰相論事有以為然而從者有不得已而強從者有絕不肯從者十常四五暨至榻前陛下又或不然大率小事之中勉書者七八安得不愧於心此臣欲去者二也上察公誠不以為罪第不許其去議者多請幸金陵公曰車駕一動能保德壽不為浙東閩中之行乎他日上又欲先下詔公曰陛下能行數事警動天下乃可上問其目公曰臣自初對便乞迎還太上於大內畫發帑付有司勿令近習干政汰溢額內侍罷擊鞠節飲燕內治舉然後可攘夷狄上稱善嘗因災異詔群臣直言公請擇其可者行之上曰類摺摭細

故耳公又及前數事至議用兵不可輕有一擲賭乾坤之語上曰今戰雖不足守則有餘公曰措置未善政事未修雖守亦難同列皆甚其言退謂公上不能堪明日公留身謝上更獎其直且曰聞卿在中書事力爭朕甚嘉之二年正月胡昉揚由義見虜帥於亳州逼昉等拜乃求還四郡昉等不可械繫月餘上怒詔張公行視師屯復遣戶部侍郎錢端禮吏部侍郎王之望克兩淮宣諭使張公尋罷以湯左相都督軍馬太傅和義郡王揚存中為同都督改宣諭為叅贊軍事會盱眙又報北界來有所議上方遣魏杞康潛克通問使副而忠義志

寧二人遽引兵分犯濠滁志在邀盟於是臺諫詆宰執
主和誤國太學生亦上書乞斬大臣公與相參並乞罷
黜上密以書示公曰初不及卿乃止詔留思退領都督
於朝以叅知政事王之望克督視公曰臨陳易將古人
所忌奈何移都督於陞辭之日况存中已為同都督之
望乃見執政反出其下願正稱謂使之速往號召諸將
併力捍虜上大以為然亦升之望同都督明日之望又
乞專委存中毋貳其權上復從之存中遂都軍馬而
湯罷先是副樞洪遵罷上命公兼知密院事公以祖諱
辭詔免繫私銜已而召用賀允中不兩月允中再致仕

公兼領如故軍國事繁悉心裁決持論正平甚得士心
湯相就敗道亡公乞許歸葬上惻然曰何至是耶胡侍
郎銓郊前與郡公奏銓以直言久謫嶺今將任子壞之
可乎上皆嘉納嘗乞召用侍從臺諫上曰安得如卿直
諒者公薦李浩龔茂良上皆以為佳士次第用之太常
言郊牛斃公奏春秋鷓鼠食牛角免郊况邊虞未靖請
展郊以符天意事下有司或引春秋傳晦日為天忌乾
德元年藝祖初郊以冬至近晦日改用十六日甲子至
道元年當郊而李繼遷叛亦改次年今冬至適近晦兩
淮復用兵當候來年恭見上帝詔從之時再遣武翼大

夫閤門宣贊舍人國信所幹辦公事王忬使虜軍而擢
錢端禮虞允文執政閏十一月新相陳公亦視事公即
奏臣向因顛墜求退聖諭廟堂無人令力疾少留今康
伯已相執政又有人可以去矣宣押數四陳相亦乞留
公：請益堅乃除資政殿學士提舉臨安府洞霄宮陞
對上曰卿筋力未衰他日宣召勿辭公奏臣今年六十
七三二年不死亦合掛冠上為悵然未幾王忬使歸虜
自滁州退師和議成矣乾道三年三月起知泉州明年
復請祠六年告老章五上加大學士致仕間適累年不
以世故縈心惟究極死生之說淳熙改元正月十二日

薨於里第享年七十有七上聞震悼贈正奉大夫後以
子升朝累贈太傅爵自宜興縣開國子加至毗陵郡開
國侯食邑通一千一百戶食實封二百戶娶李氏同安
郡夫人累贈魏國夫人前卒葬縣東清泉鄉梅林之原
明年正月己酉公合葬焉四年太常考功議以正直無
邪曰簡寬裕不苟曰惠易公之名人以為允四男長縱
從事郎點檢膳軍激賞酒庫所主管文字季楷宣教郎
知臨安府臨安縣丞皆早世棟今為朝奉大夫新知辰
州林朝散郎淮南路轉運司幹辦公事賜緋魚袋女桂
適朝散大夫知雷州鮑同孫男十二人大年儒林郎監總

領四川財賦軍馬錢糧所戶部魚關大軍倉大辯承議
郎新知和州含山縣大壯通仕郎次大本將仕郎次大
中次大昌寄理從事郎新差監總領淮西江東軍馬錢
糧所市易抵當庫次大猷大直大任大翼大雅大經孫
女十二人公孝于事親尤睦宗族當任子先孤姪謝事
編奏諸弟之子其薨也幼子與孫尚未命平生問學不
泥傳註嘗論大學物格而后知至以謂在人之至為知
在物之至為道以吾之知極物之道如兩物相抵故謂
之格夫物萬不同道一而已方其格物：我為二及其
物格則自視無我何有於物是謂知至作聖傳詩二十

篇行於世文集三十卷奏議五卷晚號惟心居士昔壬
辰歲公年七十有五予自小宗伯奉祠居_歸過陽羨別公
里第臨分執手卷：若有所屬後二年而公薨棟等推
原先志以著作佐郎李遠所述行狀屢來請銘其猶子
擢用公奏入官今掾廬陵日道二子之意趣如約義不
可辭銘曰

惟幾惟康 古倚良弼 耳目股肱 嚮上則一
降及後世 其職乃折 越在臺諫 歲規排擊
進居廊廟 將順輔翼 前之責人 今以自責
躬或不逮 言孰底績 惟簡惠公 端諒篤實

和戰何常 隨事應敵 其在我者 自治吾國

時雖不同 論則無易 或從或違 有始有卒

皇心褒嘉 士論厭塞 我作銘詩 追紀賢德

一言蔽之 主聖臣直

中大夫秘閣修撰賜紫金魚袋趙君 善俊 神道

碑 慶元五年

君諱善俊字俊臣太宗皇帝七世孫曾祖仲營崇信軍
節度使開府儀同三司追封成王妣楚國夫人王氏祖
士嘗登進士第終左承議郎贈中奉大夫妣令人石氏
父不哀任閩路兵馬鈐轄家于邵武贈大中大夫母碩

人滿氏君幼力學強記為文日數百言年十六薦名南
宮紹興二十一年以取應補承節郎監南嶽廟又六年
中文科以忠翊郎換左承務郎知南城縣丞三十二年
轉承事宣教郎簽書昭信軍節度判官廳公事明敏練
達遇事風生太守以名聞孝宗方留意人物虞丞相允
文亦薦君有邊帥才乾道三年堂選幹辦諸司審計司
五年兩易提轄權貨務都茶場六年夏求補外便親知
郴州陸辭敷奏詳華上喜曰宗室乃有斯人留為太府
寺丞發左帑奸弊人服其能兼權度支郎官歷奉議承
議朝奉郎十二月擢淮南轉運判官分治西路兼刑獄

茶鹽帥郭振卒詔君攝事明年就除直秘閣知廬州歲旱江浙饑民麋至君既竭力周恤仍括境內荒熟官田三萬六千餘畝分三十六圩請凡土著流移視力均給而貸以牛種生者予屋死者給槨條具來上詔大理寺主簿薛季宣同君措畫竟亦不能易也先是土曠人稀招耕戶一率費緡錢數十君因流民仰食為裁其直主客俱利戶口日增嚴戒團甲隊長毋以徭役擾之仍乞給復五年大稱上意八年進直徽猷閣上手札問今歲二麥幾何經早乾者何以賑之君奏麥已登場并疏耕種次第上就委君廉問官吏貪殘刑獄冤濫其倚信如此

州城舊為虜人所夷郭振修築未竟君自詭續其功詔金陵都統司共圖之君言異時恃焦湖以通饋餉今湮涸當浚鄉兵舊保孤姥二山且儲粟焉今屋壞葺願輟州財充其費脫虜敗盟則吾守城之兵餉無道之守險之民至者如歸矣又陳軍政三弊及招萬弩手補神勁軍之闕稍旌民兵武勇者以勵其餘禁奸人盜馬淮北事多施行於是大修學校新馬忠肅包孝肅公祠廣姚興廟春秋嘗奉文武之士歸心焉詔以職事入觀上嘉獎再三遂令再任九年春召為考功員外郎年勞邊賞轉朝散請即朝奉大夫七月罷主管台州崇道觀纔半

歲上思君籌邊復召赴闕道除知襄陽府其臨遣也諭以虜泛使在此故擇重鎮付卿加直龍圖閣淳熙元年也至則治民整軍如合肥時亦有盜馬北界者對境執以來君受而戮之邊人畏服轉朝散大夫十二月移漕淮東士民挽留問道乃得去以親老請間徙知婺州未上求守甌寧去家僅二百里三年奉雙親開府閩人以為榮君因俗而治痛懲不舉子者凡產育給金穀如格仍捐俸助之會淮西再謀帥四年復知廬州君言和好不可恃戎兵不可增城濠不可不濬軍士屯田費大利微罷之便上以為然孫叔敖苟陂西漢七門堰溉田不

賢君推尋故跡募民修復屬邑坊場河渡已輸正錢又取羨入公帑君皆蠲之淮人迄今有遺愛六年懇求歸養詔與便郡遷朝請朝議大夫俄丁外艱服除主管武夷山中佑觀十三年起知鄂州上曰武昌凋敝藉卿撫摩行召卿矣未至南市大火焚萬室客舟皆燼溺死千計君馳往視事闕官舍出倉粟以待無所于歸之人弛竹木稅開古溝創火巷以絕後患僚吏爭言用度將不足君曰吾且瘠己肥人凡燕遊饋遺例冊所供下至車騎鼓吹一切省去未幾公私交裕並代民輸稅役麥子一年郊恩封祥符縣開國男食邑三百戶轉中奉大夫

十四年再守甌寧奸猾乘穀貴導饑民群趨富家發其廩監司議調兵掩捕君曰是趣亂也揭榜許自新而諭有力者平其價人以按堵邑尉獲盜希賞笞掠抵重坐君平反十三人俗喜鬪殺君按甲令禁私造軍器置義塚以瘞旅柩皆畫旨行之十六年豫章闕帥上親用君會樞臣出鎮改閩漕引鄉嫌移江西轉運副使壽康皇帝覃恩轉中大夫初議減月椿君言及州不及縣則縣仍迫取於民猶不減也如本道隆興歲起十四萬緡撫州半之州不足率均外邑而邑之多寡自不均宜通一路裁額若干下之漕臣酌郡縣偏重者均減之實惠乃

可及民又奏和買已白科從而折變益以靡費其數反重於正絹江州德化縣倚閣逃戶稅而總領所猶督折帛請併議蠲減諸州黥卒遇赦還為民害宜聽其留不則改刺鋪兵凡所獻明見謂合宜閱半年除帥湖南首乞擇柳桂守臣而賞其有治理效者嚴棟中禁軍教閱而効事藝不應格者後皆如君言凡代納潭州屬縣經總制錢及放折米折粳頭脚等萬計又代輸善化縣兩鄉營田米二分湘陰荒田正米五百斛停醴陵淶水渡錢補以州用攸縣舊科黃河鐵纜歲萬六千緡其二留州君既不取其一送使復為丐免其加惠斯民多此類

會臣僚請諸道節州費寬屬縣君曰是吾心也又減七
萬緡巫唐法新假神言易十者詛其婦翁劉子光子光
忿甚募人支解易沉之江獄成以屍不經驗奏裁君曰
是可貸乎卒請殺之因毀淫祠勒他巫改業治行轉聞
紹熙二年遷秘閣脩撰招軍賞賜服金紫尋召還在道
差知鎮江府易泉州將赴丁母憂追慕切至築蓼庵以
居甫免喪而卒慶元二年六月二十四日也享年六十
四妻令人黃氏佐君事親以孝稱子男三人汝將迪功
即撫州司戶叅軍汝石受命而夭汝正從事即監泉州
在城鹽稅女二人長適從政郎新興化軍興化縣令謝

好古次早死孫女一人明年十月庚申葬邵武軍邵武
縣大坂之原君丰儀秀整襟度坦夷與人交緩急盡力
年壯氣盛時以功名自期尤喜論事如謂相位不可久
虛日中黑子郡國地震當飭邊備理宗每嘉之屢欲用
君因奏進士任子自分兩塗仕州縣者不相下蓋由階
帶左右流弊至此頃揚時嘗論之今華貫清塗非進士
自不可至豈在二字宜如元豐官制有旨從之自後每
為議者所指無裏言矣所著詩文二十卷藏于家予識
君三紀中嘗同朝晚代君守長沙嘉其整暇又能集名
士裒圖志五十卷貫穿古今自為之序益知其才之高

汝將等以司馬邁狀求銘乃為銘曰

昔在裕陵 作成宗英 養而教之 以義濟仁

粵踰百年 應若麟趾 儒猷吏方 與寒峻齒

君才有餘 皇眷實紆 三馳壯轡 四提帥符

聲名孔昭 光我帝系 猗歟盛哉 本支百世

平園續稿卷第二十三終

平園續稿卷第二十四

周益文忠公集六十四

神道碑四

華文閣直學士贈金紫光祿大夫陳公 居仁 神

道碑 慶元五年

士大夫行誼著于鄉文章顯於朝豈弟布於郡國有一
烏足為名臣况兼是三者乎求之近世吾同年陳公其
人也公諱居仁字安行曾祖砥妣林氏祖嘉謨贈右朝
奉郎妣安人黃氏父橐左朝奉大夫太府少卿累贈特
進妣安康郡夫人蔡氏新平郡夫人汪氏七世祖自光
州避地徙泉之莆田縣 升軍故為興化軍人太府再

娶汪夫人而家明州靖康初為汾州教授佐守臣張尅
戩扞虜已有名後知惠州單車造賊壘降之勤僧王法
恩謀叛事覺誅戮將及無辜太府方為御史論救多得
免人知其有後矣公幼不群年十四而孤侍母依外氏
已能屬文門蔭起家右迪功郎信州鉛山尉中紹興二
十一年進士第用舉主陞左從政郎移永豐令入監行
在黜檢贍軍政賞酒庫所糶場孝宗登極循左文林郎
隆興改元修高宗聖政時叅政范公成大監和劑局與
公並兼檢討官益異選也淮甸交兵魏丞相杞以宗正
少卿使北辟公書狀官虜人被甲彎弓夾道脅使者公

馬上舉酒屬魏卿天寒醕此觴觀者壯之減歲幣成禮
而還贊助為多先以格改左宣教郎用出疆賞轉承議
郎擢諸王宮大小學教授遲次久之乾道六年四月始
供職明年秋徙軍器監主簿充國子監發解黜檢試卷
官宗正修玉牒賞厚適丞闕朝士競求之宰相知公恬
靜八年春堂帖兼權會輪對論立國當定規模號令不
可輕改四月遷將作監丞十月轉國子丞九年進丞秘
書歷朝奉朝散郎中興會要成轉朝請郎再對論文武
並用本以揀偏若智謀勇略未進而便佞輕躁者得之
將復有偏勝之患孝宗嘉納長貳闕公行省事議試太

史局坐與臺評異不自安請外不聽郊恩賜服緋魚權
禮部郎官淳熙元年再求去八月選知徽州陞辭上曰
政成召卿矣明日又對大臣稱其明練歎在五季為偏
方夏稅特重祖宗故輕之他郡輸絹率以十二兩惟歙
十兩比歲戶部謂不中度却之人以為擾上欲仍舊貫
而慮輸有輕重吏得病民每十二匹特蠲其二四年公
適視事植二表庭下閱中否親分之吏不能措手秋苗
斛捐五升預造津渡巨舟以待春漲省費十四五後遂
為例決事公明隣有訟多詣臺省乞付公御史間取文
案復視歎曰真良二千石也奉詔招軍公令願行者立

燾下有雍彥恭貌頗異公詢奚自泣云父有遺澤厄窮
至此公立取文書保任官之士族感歎積閱累轉朝請
大夫秩滿邦人挽留間道乃得去入對上諭以從臣言
路多薦卿公請編類即位以來寬恤詔令示民不忘又
乞申戒輸絹之弊上曰改法賴卿方成實惠又曰卿在
郡便民五事內欲優十三項戰功朕極不忘此輩既為
國宣勞豈應老不加恤耶留為尚書戶部員外郎命未
下朝士再推會要賞上曰陳某治行第一可因是併賞
之特轉朝議大夫陞郎中兼行度支又兼禮部明年春
類試公試秋國子監解試皆為考官遷樞密院檢詳諸

房文字八年三月為右司郎中九年十一月進左司十年轉中奉大夫檢正中書門下省諸房公事歷兼提領雜賣場寄椿庫左藏封椿庫左藏南庫寄椿錢物及左藏庫借撥封椿錢物左右史教闕上輒詔公攝侍立官閏十一月假吏部尚書充全國賀生辰使十一年使回轉中大夫遂除起居郎公徧歷宰掾精明詳審議事間有未合必反覆辨析期協于理文書下六卿報應稽緩公擿其尤者治之不以六卿尊貴而廢也獄案多所平反或有叙虐必歸于平上每知之嘗奏湖湘運米遠下昇潤江西及汴荆鄂迂滯勞費互易為便上謂非卿體

國誰能及此至是直前謝新命上曰卿端靖有文欲冥清要久矣今綴近班有閫當入告尋兼同詳定一司勅令明年兼權中書舍人御史奏僧寺寓柩子孫十年不至即聽焚瘞公言期迫則緇徒得逞其私不肖子孫亦或興訟請倍年數仍從州縣驗問上曰臺諫給舍議事或相表裏如卿可謂和而不同者矣郊祀前四日真拜中書舍人以示簡記賜服金紫陞兼詳定勅令公言常赦宥過弛欠惠不及小民願因慶壽恩蠲四等戶身丁之半五等盡免從之安定郡王子昭乞封妾為夫人公執不可上大喜謂有補風教又論人主當執要母親細

務上曰亦覺叢勝他人未嘗及明旦令輔臣清中書之
務已而奏外郡財賦上曰方以陳某言諭卿等此當責
之監司丞相而下皆媿謝公又乞絕浮費汰冗兵計當
省之數議蠲除之目此富民要術也上深然之學士洪
邁知貢舉命公權直院上曰內外制向委數人今陳某
獨能辦官欲擇人信非虛語轉大中大夫高宗升遐醫
官王涇削官編置刑房非公所領公率給舍列御繳駁
徑坐決配思陵之役議者多請節費公謂哀頓可也酒
果三日一易可乎上泣曰微卿言朕何由知公屢以母
病乞去上不可內出珍劑以賜仍獎諭云卿盡忠知體

欲用為諫大夫頗疑左遷它日處卿中同亦諭政府陳
某又次方議峻遷會母夫人卒上嗟惜再三厚賻金帛
紹熙元年八月從吉壽康皇帝前期除公集英殿修撰
知鄂州三司鼎峙軍民訴訟交至公平心以應舉得其
懽心郡計仰征稅公寬而有制商賈輻輳境多曠土公
禁冒佃招流逋田疇日闢募人築大堤以防水患名之
曰萬金安樂寮居養貧病名存實亡公括閑田益之至
者如婦姦此盜鑄沔鄂間千百為群亂有萌芽或請調
兵迹捕公召民兵總首密圖之立獲渠魁餘悉縱遣歸
農歲大比閩士爭冒試轉運使右之公一切禁止治為

諸郡最三年春拜煥章閣待制十月徙知建寧府四年
轉通議大夫歲儉糴貴公出儲粟弛逋欠以巨萬計市
道頓平間遇水旱祈禱立應俗素剽悍動輒殺人又喜
把持誣訴公親為文數百言疏其情狀厲以法禁治閭
毆嚴甚旁觀弗敢捩併坐之五年夏重華服藥遠方傳聞
洵、浦城惡少煽亂至戕一家數人公擒捕送獄今上
登極大赦至公命戮之而自劾於朝先是觀察推官柳
某死貧不能歸乳姬挾二子行丐于市公聞之給以粟
帛命士人教養之德刑並施人方安其政會鎮江大旱
調守良難乃以屬公覃恩轉通奉大夫十月至府力請

發封椿粟擇委僚吏分場賑給時屏騎從潛往視之間
遣市米江湖間大商人：知陳使君爭出米求售公區
處有方誠意孚洽全活不可計他處流移亦賴需丐人
謂自昔救荒未有如公者天墜萬艘銜尾一遇風濤沉
溺相望公訪古海鮮界港因飢民濬治之距城十五里
舊造閘通江潮灌運河地勢素高力勞易朽公命疊石
為斗門以機引水遇滂洩之猾僧廬江陰界囊橐不逞
一日來訴邏卒侵擾公致詰而色動縛置獄中擢尉曹
掩捕盡獲群盜人以為神慶元元年冬荒政策功特轉
正議大夫即代輸下戶稅增廣貢院新范文正公舊橋

示餘力也明年七閩謀帥五月加寶文閣待制知福州
閩公鄉部且嘗治富沙熟其風俗初入界飢民有嘯聚
者公部公逐兵遮擊之首惡雉經餘黨望風屏迹下車
除監直之通增貢銀之價嚴蠱毒之禁宗室犯法治不
必恕內侍幹辦啟運宮者以例折簡具食公劾其慢免
之莆中親舊憧：來賀館待一出私錢慶乎則捐奉有
差為士者隨才成就之三年二月召赴闕次近郊以脾
疾丐間不允五月再請乃除華文閣直學士提舉江州
太平興國宮就賜對衣金帶歸而納祿轉正奉大夫疾
革語諸子曰吾欲刻碑先塋斥田兩頃為義莊二事未

就以是付汝言訖而卒六月甲寅也遺表聞贈金紫光
祿大夫享年六十九爵自莆田縣男至奉化郡開國侯
食邑通一千二百戶妻碩人王氏贈朝議大夫居隱女
先公十三年卒葬鄞縣豐樂鄉橫溪西與之原是歲十
二月甲申諸子奉公柩合葬焉子男六人鞏故宣議郎
嘗魁國子華畢未命而止曰芾兩試南宮今為通直郎
新知湖州武康縣曰卓踐世科今為宣教郎新知紹興
府餘姚縣卓承奉郎義方之教有自來矣一女早夭孫
男四人允協承務郎允迪允修允諧孫女五人長適鄉
貢進士石渠次許王堃餘尚幼初太府自莆徙鄞故鄉

田廬推與群從，鄣產雖薄，公念季公貧，請於母而中分之。既仕，復輟俸為畢婚嫁，女弟出適，又鬻田以資之。上登極，遣甥王激表賀，補將仕郎。其孝友類此。公風猷粹穆，資性忠厚，處已應物，一以誠信。事賢友仁，心無媚忌。樂施周急，不計多寡。交際之間，和氣可掬。人負已亦弗校。及臨事，則毅然有守，不可間干。以私立朝，每以忠言至計禪當路，故相陳正獻公嘗薦公有父風。汪端明應辰、韓尚書元吉、程尚書大昌、楊待制萬里當世、儒宗文師推公為名勝。在禁近，盡言無隱。夔帥林栗擅格制書，上怒不測，揚待制以秘書少監論事，外補公。皆上奏，求

止歷典數，即率乘早歎匱乏。公悉心措畫，責成其下。人樂宣力政事，日修財用，自足寬嚴適中。號稱循吏，所至皆立生祠。道出舊治，迎餞塞塗。平生不以私喜怒加人。退食澹然，讀書宴坐，置家事不問。居室以澹為名。客至承顏接辭，自謂鄙吝可消，爭心可弭也。所著制稿奏議二十卷、詩文班左、擷芳各十卷、芾等知予與公厚善，以公外弟翰林樓尚書鑰之狀，遠來請銘。予常愛唐中書舍人王仲舒為告，有古風。守峽婺蘇三州，晚帥江西，有治理效。韓文公既誌其墓，又為神道碑。其詩曰：志儒之本，達士之經。有直有諷，以志遠名。翔于郎省，騫于禁密。

發帝之令簡古而蔚又曰久淹于外歷守大藩所至極
思必悉利病化成有代思以息勞虛位而俟忽隨滔
嗚呼孰知數百載之後斯言殆為公設歟鄙辭尚何所
措姑拾此意而為之銘曰

文與行偕 治民允懷 左右具宜 古難其才
有美陳公 柔惠且直 沉酣載籍 如嗜飲食
入而事君 謀猷孔嘉 累載代言 燁然詞章
出而承流 威愛兼濟 五州去思 曾其豈弟
帝曰汝來 將圖爾庸 胡不憇遺 奄兮告終
公如仲舒 我愧韓子 誰其採詩 尚告大史

資政殿大學士左大中大夫叅知政事贈太師

張忠定公 燾 神道碑

乾道二年四月旦資政殿大學士左大中大夫致仕張
公薨于饒州德興縣之里第是歲十二月甲申葬本縣
鑄印臺先塋之側其子既類行實聞于朝謂某嘗以文
學掾事公于昇謁銘詩揭墓道義不得辭按張氏世家
德興唐宰相文瓘之後子孫散居縣之諸鄉衣冠不絕
國朝多以進士入官公曾祖諱潛通直郎致仕贈太子
少保妣壽安縣君葉氏贈清河郡夫人始居吳園長沙
王芮故里也祖諱磐袁州萬載縣主簿贈太子少師妣

長興縣君程氏贈通義郡夫人父諱根元豐五年進士
將改京秩以近大禮亟欲升朝推恩祖父母遂致其仕
歸養四親年方三十一久之近臣交薦賜對再仕終秘
閣修撰淮南轉運副使文行俱高世號吳園先生公貴
贈太師妣南華郡君黃氏尚書右丞履之女贈秦國夫
人公諱燾字子公幼莊重嗜書右丞喜曰是兒骨聳神
清他日必貴將命以官會薨諸舅承先志奏補太廟齋
郎公猶牛角學愈力入成均升上舍政和八年廷試問
五運六氣公對數千言極論陰陽消長天人精祲與夫
裁成輔相之道天子嘉之親擢第三授文林郎辟雍錄

宣和元年遷太學博士三年連丁內外艱服除再為博
士充南省檢點試卷官北虜入寇靖康改元之正月李
綱以執政為親征行營使守禦京城辟兼機幕遷秘書
省正字四月解嚴特改宣教郎自列綱妻弟求補外時
權要親戚多在朝嫉之坐以越職言事送吏部明年高
宗登極改元建炎例復行營及宣撫司官屬之責降者
以公通判常州改湖州賜緋衣銀魚二年詔班巡社法
于東南聽民自備器械結隊伍公條不便者十六事卒
罷之三年苗傅等謀逆臨安公適攝郡亟募兵三千入
援乘輿反正論勤王功特轉一官四月大赦求直言公

上疏曰陛下踐位於傾危中繼遭叛逆號令不能感動人心政事不能
壓人望卑詞厚禮祈還二聖未有以動感敵情豈胸中之誠未修乎又言賢不肖雜進大臣
惟親舊是用虜方陵犯乃欲議和淮寇縱橫乃欲實粟京師踈繆如此而侍從不言臺諫不論其職安在又言
巡幸所至未免營繕越棲會稽似不如是疏入不報請
主管台州崇道觀紹興二年春駕自越回臨安宰相呂
頤浩薦公召對論三事其一曰天下之病極矣醫國者
未見治效願定國事以某事為本某事為末某事可因
某事可革規模既立以次行之其二曰昔之致禍由縉

紳以僥倖相師世俗以侈靡相夸官府賄賂公行將帥
偃蹇自肆州縣誅求無藝百僚偷墮廢弛今皆有之其
三曰陛下欲整軍而求一樞臣不可得欲理財賦澄銓
曹而吏戶部長貳每難其人古不惜賢于異代在陛下
加之意而已除尚書司封員外郎再對論及聖學有取
法唐太宗之語公曰陛下誠欲取法必用賢必納諫今
所謂房杜王魏誰乎且太宗英武百戰百勝乃者手詔
明言扞夷狄援中原而實圖退避之計何也又請早定
國論詞甚剴切于是置脩政司講求治要命宰相提舉
自公發之五月詔在內職事官在外監司守令及曾任

郡守郎官以上者各述所見公因極言時事乞復置御
營司分諸將為六軍命大臣大將為使副各典一軍以
收兵權舉淮南之地分置征鎮使自戰自守又乞躬行
實德以率百官皆他人未嘗言者六月擢起居舍人奏
欲知敵情莫如厚設爵賞廣募間探事皆預備毋蹈往
歲維揚之失尋詔都督府各沿江諸將如公言是秋上
欲用舊相朱勝非代秦右相檜先以侍讀召而給事中
程瑀中書舍人胡世將執不可劉正為左史公為右史
次當書行亦謂不可又命左司林待聘右司樓炤攝承
皆辭六人並以宮觀罷五年宗祀赦後直顯謨閣積階

左朝散郎六年秋再以起居郎召入謝上曰久不見卿
殊渴嘉言公力論風俗久壞必盡掃而更張之又言二
史職廢乞用唐制群臣奏對史官侍傍事必記言必書
一日宰執更互留身公曰公事公言今五六執政人各
進說殆非同寅協恭之義暫權給事中改兼外制七年
二月真拜中書舍人賜服金紫公感激上知政事闕失
盡言無隱金陵宮室未備置修內司命宦者王鑑領之
鑑諸聖祖殿基營私第部曲多占民居其使臣儲毅托
名御莊冒占腴田大為奸利會日有訴者按驗得實止
鑄毅官公曰此與宣和間李彥西城所公田何異毅不

足道鑑實使之上為逐鑑仍罷御莊言者論司農少卿
樊賓屯田負外郎王弗提領營田擾民無益以其事歸
帥漕而召賓弗還朝公繳奏二人皆罷都督府請修造
建康城期會迫促又以軍儲不足夏稅正絹每疋折錢
八緡公言行宮甫畢不宜復興大役民力已困卒變何
以堪之詔罷築城而折帛減二千至今以為例張丞相
浚兄滉自蜀來既除職與郡又賜出身公與張公同年
相善勸其力辭張公迫母命難之即繳奏竟寢有觀望
者乃指公論他事異同罷為提舉台州崇道觀公素不
以兵部尚書呂祉代劉光世統軍合肥為然至是鄴瓊

殺祉率全軍數萬人以去上記公言加集英殿修撰八
年四月召拜兵部侍郎公奏臣屢言規模先定乃可為
國遷都大事也期年之間方進臨安復退還浙輔弼重
任也一紀之間下命相之制者十有四進退執政無慮
二十餘人規模安在上曰非不欲立規模正緣宰輔數
易耳六月兼權吏部尚書十一月又兼史館修撰去冬
虜發劉豫使來議和秦丞相再相主之朝論籍籍公請
詢可否于衆上乃令侍從臺諫即日條奏公上疏數百
言大概謂天方佑宋當自治以需天時屈膝事人非臣
所知又率侍從極陳失計嘗面折御史中丞龍如淵曰

達視其所舉君昔薦七人後皆北面張邦昌今囁嚅附
會墮虜計中它日必背君親矣監察御史施廷臣擢侍
御史太府寺丞幕將賜出身超拜起居郎皆上書迎合
者翻黃下吏部公執奏曰故事遷除未有如此之驟力
詆兩人引疾卧家秦素厚公命樓炤問疾許直翰苑公
曰今日進退在我遷官則在他人其惟有去耳秦語人
云張子公守政官職不能動也徽猷閣待制蔡確贈官
前叅政李回追復職名公謂確等事偽楚而為之用並
乞追奪其攝銓曹遇事不苟如此是冬和議成復河南
陝西境土九年正月上以祖宗陵寢久淪異域詔公同

光山軍節度使開府儀同三司同判大宗正事士儂修
奉灑掃賜銀絹有差以二月己巳陞辭自武昌信陽入
蔡頰五月丙戌至永安軍戊子朝謁諸陵庚寅修奉畢
辛卯由鄭歷汴宋宿泗淮南以歸六月入對公奏頰年
陵下石澗涸竭使至而水流如故上驚異久之又陳使
事十餘條如謂劉豫初廢人情洵而我斥堠不明坐
失機會謂鄴瓊部伍皆西陲勁兵今在河南尚有收用
新疆賦租已蠲而使命絡繹推恩支費猶用兵興時例
願加裁損非甚不得已勿遣使以寬民力上悉嘉納七
月除權吏部尚書首論官冗半年間授官觀嶽廟九百

用益公集 正國續和卷二五
餘員坐糜廩祿虛理資考方議革銓選之弊會四川制
置使胡世將升川陝宣撫副使成都謀帥上語宰相張
某高明練達和正有守可寬西顧但朕惜其去耳臺評
朝論亦謂當留公力請行九月除寶文閣學士知成都
府特製金帶以賜初加佩魚宰相以官制為言而止公
奏蜀困征徭臣當宣布德意寬一路之民上曰豈惟本
路凡四川寬恤悉以付卿又奏主和者捷懶也今為其
姪兀朮所戕勢必輸平乞道京洛關陝謁世將於河池
共議邊計至則謂世將諸軍今戍陝西饋餉雖寬如緩
急何宜歛兵備蜀口仍丐錢五百萬絡為儲積世將皆

奏行之公以十年春至益與世將尺牘交馳講畫素定
是夏虜果叛盟窺蜀吳璘及楊武郭浩大破之俘獲萬
計其後公除西府蜀人唐文若草制云保蜀之功著龜
先見蓋謂此也十一年詔世將納契丹降人公曰蜀地
狹安能容且不鑒前朝常勝軍乎世將奏寢其事蜀自
用兵和預買匹布折估錢二引民已病之至是轉運司
迫餉軍增至三道成都一路總七十四萬七千有奇公
言昨降度牒二千稱提錢引數適相當願以此代輸從
之初公開府適承歲旱大發積粟以賑飢民撫存黎稚
蕃部禁戢貪吏開修渠堰蠲落江田稅決遣獄訟修文

月五公集
翁舊學時與諸生講論經旨葺諸葛武侯廟杜少陵草
堂新張垂崖祠政無不舉蜀人大悅屢請代不聽十三
年冬始命提舉江州太平觀時舊人往以異同得罪
公家居絕口不言世事取吳園先生遺編數百卷手自
抄定又追先志斥俸餘為義莊贍宗族自號雲山老人
二十五年冬秦丞相薨舊人在者皆起上首以公帥鄉
部兼行宮留守司公事明年二月至金陵積歲負庫錢
帛鉅萬公悉奏免池有義子與父爭訟守昏謬繫父連
年不決公請移廷尉黜其守居二年政成化洽進端明
殿學士考課累轉左中奉大夫二十九年夏召赴行在

公奏虜主遷都和好難保惟陛下儆戒無虞自反求治
上喜曰久不聞卿議論良沃朕心是夕公腹疾暴作亟
請休致上大驚用前執政禮廕公提舉萬壽觀兼侍讀
公再移病給寬假還鄉數月疾平連有旨趨覲公奏兩
郡王名分宜早定上曰朕懷此久矣人所難言開春當
議典禮公頓首謝時風俗侈靡財用匱乏公勸上止北
貨之貿易者非時之賜予罷土木減冗吏躬行節儉民
自富足上嘉獎再三公遂言甲庫萃工巧以蕩上心酷
良醞以奪官課教坊樂工員數日增俸給賜賚耗蠹不
貲上曰卿可謂責難于君明日罷甲庫諸局以酒庫歸

有司減樂工數百人正除吏部尚書侍讀如故虜使施
宜生來賀三十年正旦命公館伴宜生聞人公以首丘
桑梓語動之宜生雅敬公頗漏虜情公乞早為之備會
疾復作力求納祿詞極哀切上命湯丞相思退留公
請不已轉左中大夫加資政殿大學士致仕特給真俸
公方去即降詔立皇子云明年冬起公再帥江東完顏
亮已深入人情克懼公不敢辭亮死哀復求和詔沿江
帥守條具進討恢復計人、馳志幽燕公獨乞持重養
威觀釁而動已而諸將追躡果無功尋以張忠獻公代
公命公奏事公言前日邊遽義當彊起今憊不能支矣

復提舉江州太平興國宮三十二年六月孝宗受禪御
札召公道除同知樞密院事公懇辭又遣子挺入辭上
命中使賫手筆趨朝許乘車至宮門給扶登殿問為治
之要公言內治乃可外攘今天下弊事至衆中外望治
願如祖宗及太上紹興二年五月手詔命百執事赴都
省給札條具上大喜御批略云覽燾所奏犁然有契于
衷其令侍從臺諫集都堂賜以筆札取當今弊事恚意
以聞退各于其聽治之所盡率其屬諭以朕意極言毋
隱於是士大夫平日欲言不能自達者纖悉聞矣上皆
親閱標識急務付公看詳公請擇可行、之單恩轉左

大中大夫隆興元年三月遷叅知政事公以老病不拜
臺諫交章留公上還公奏且命宰相諭旨云朕不敢煩
公以政姑為朝廷重可也公辭益堅上亦察其實病遂
除資政殿大學士提舉萬壽觀兼侍讀恩數視政府公
援紹興末例謁告將理上乃許之及家固求致仕詔從
其請後二年而薨享年七十五贈宣奉大夫謚忠定爵
自德興縣男累封鄱陽郡開國公食邑通三千五百戶
食實封三百戶後以子遇恩累贈太師娶程氏同郡徽
猷閣待置鄰之女先卒追封秦國夫人二男朝議大夫
荆湖北路提點刑獄公事玠朝議大夫廣南西路提點

刑獄公事玠分符持節皆有冢法一女適鄒忠公浩之
子處州太守翊孫男十九人鑄朝散郎兩浙轉運司幹
辦公事賜緋魚袋鎮通直郎荆湖北路安撫司幹辦公
事鉅儒林郎福州錄事叅軍鎡承事郎鎰承事郎新差
監鄂州在城鹽稅務鐸鎡將仕郎鉉鎡鏞鎡鎡鎡鎡鎡
鍵鐘錡未仕孫女十四人長適周簡惠公察之孫奉議
郎沿海制置司幹辦公事大辯次適王恭簡公剛中之
孫承奉郎元老次適嗣秀王伯圭之孫宣義郎新添差
淮西提舉茶鹽司幹辦公事希德次適陳文恭公康伯
之孫通直郎簽書福州軍事判官廳公事景祖餘尚幼

曾孫一人濤修職郎隆興府新建縣主簿玄孫一人稟
公外和內剛臨事有仁者之勇在蜀四年尤著惠愛百
姓皆繪像以祀後帥李璆贊云公昔在蜀千載一人公
今去蜀千載其身願公再來以慰斯民益實錄也得謝
復出以至大用俸賚往積而不支平生清修簡靜無
所嗜好頗喜大書得顏魯公筆法望而知其為端人正
士顯仁皇后神主公所題也有外制二十卷奏議三十
卷雜著二十卷藏于家其竊惟公歷事四朝始末可考
早官成均學術行誼人已推之欽廟初政即以議論氣
節有聲館閣被遇高宗出入侍從越三十年知無不言

而上不疑誼形于色而下不忌世論名臣推以為冠小
人雖間不說終不敢妄有指議孝宗首從人望召寘二
府將盡行平昔之言而公老且病矣退休于家以壽考
終歷觀五十年間士大夫進退成敗殆非一端蓋時有
險易道有屈伸或榮於前而辱於後或譽于上而毀于
下求其常負重望始終全節如公者鮮矣宜有銘詩以
信後世銘曰

忠則不欺 公則不私 明則不疑 正則不欺

堂：張公 具美在茲 學識卓然 氣節隨之

時有難易 心忘險夷 遇事極言 見義勇為

如璧如圭 表裏無疵 如著如龜 計策無遺
獨立近班 國之表儀 久任兩鎮 民之父師
紹興季年 大政方咨 公曰憊矣 祈哀以辭
孝宗纂承 元老耒思 災疾益侵 壯猷莫施
位豈不高 人嘆辰遲 壽豈不遐 人望期頤
四朝遺直 千載清規 相彼先塋 山川逶迤
公所自卜 是祔是宜 斷石刻辭 以永厥垂

平園續稿卷第二十四終

平園續稿卷第二十五

周益文忠公集六十五

神道碑五

敷文閣待制贈少師張公 卽神道碑 慶元五年夏

靖康陽九之厄北虜以封豕長蛇荐食上國繼之劉豫
梟鳴河南高宗皇帝受命中興日與文武大臣經營四
方期雪讐耻而父母之念尤切於衷謂兵交使在其間
每擇忠義明辨之士問安沙漠項背相望十五年間能
全節而歸者惟鄱陽洪忠宣公歷陽張公及新安朱弁
少章三人而已少章雖文士時以右選介別使不得專
對惟洪惟張俱以儒學奮身官視八坐日夜以忠言說

虜：必欲臣之二公掘節不屈則放之若寒不毛之地
衣食往：不給火之其首長或知慕鄉稍遣子弟從之
游賴以餬口如是一紀訓誘涵濡轉相告語知用兵弗
戢自焚之禍迄成和好還徽宗梓宮歸我太母人固知
聖主之德文武大臣之功而潛導馴致易暴為善此兩
公陰有助焉歸拜白髮之親其子某亦植立光顯然後
人知天報昭：不可掩已間嘗以是語人無不謂然張
公之子遇有舊數以故友朝請即聞人阜民所述行實
來請銘乃參考史氏序而銘之公諱某字才彥和州烏
江人唐國子司業籍之後世儒家曾祖延慶祖補嘗預

鄉薦父幾鄉譽尤高贈金紫光祿大夫妣永寧郡夫人
馬氏公少傳父學宣和三年登上舍第旋丁外艱建炎
元年二月以迪功郎為衢州司刑曹事兼管檢法議刑
二年三月詔中外士民直陳時事公言有中原之形勢
有東南之形勢今縱未能遽爭中原宜進都金陵因江
淮蜀漢閩廣之資以圖進取不應退自削弱郡守胡唐
老竒之三年給事中周望為江浙制置使逐捕苗傅劉
正彥過衢問唐老僚吏孰可用唐老薦公以克準備差
使賊平望入西府九月公改承奉郎召對會遣泛使公
毅然請行假禮部尚書特轉五官除直龍圖閣武臣楊

憲副之二弟祈那皆補官仍添差祁明州觀察推官奉
毋以居公即日引道見虜監軍即君榷懶於濰州逼公
拜公不可執寘昌邑尋徙密州柞山寨以兵守之四年
夏公聞榷懶過密以書抵之曰兵不在強弱在理曲直
宣和以來我非無兵也帥臣初開邊隙謀臣復啟兵端
是以大國能勝之其後偽楚僭立群盜蜂起曾幾何時
電掃無餘是人心天意未厭宋德也今大國復裂地以
封劉豫窮兵不已曲有在矣榷懶得書執付豫使用之
公升塔揖豫以舊官呼之為陳君臣大義辭氣激烈豫
怒繫之獄揚憲遂降閱半年豫知不可屈復以公送虜

拘之燕山園福寺紹興元年也公又為書言豫挾大國
之勢日夜南侵不勝則首鼠兩端勝如養鷹飽而飛耳
終非大國之利欲以間豫守者密以告虜取其書去益
徙公東北千餘里之中京後又北徙會寧府去燕三千
里先是元顏旻死傳其弟晟晟死旻之孫亶立三世顏
厭兵慕文教後生從公者皆習弦誦執經授大義爭饋
錢穀布帛公自分終為虜嘗肆赦許我使者因便歸其
鄉人：占籍淮北幸得稍南惟公與洪公朱少章實言
家江南十三年二月甲子虜忽召三人者改館致饋許
之南歸公以四月辛未至燕山洪公先有五月朱自雲

中至六月庚戌同發永平館七月壬戌次汴京都亭驛道中有輜軒唱和集公為之序八月庚子對行在除祕閣脩撰主管祐神觀公奉使時轉五官吏部誤謂兼出身擬奉議良乂方改朝奉即公為上言前後使者如陳過庭司馬朴滕茂實崔縱魏行可等皆徇國忘軀宜優恤其家崔縱之樞臣挈以來乞勅葬以獎忠義上雖下其章當路格不行尋諷御史論洪公忤守饒州公自以太夫人年七十謁告歸觀方出門而諫官亦誣公在虜不禮其副遂改台州崇道觀居從其便非上意也十四年七月丁太夫人憂疏食廬墓執喪盡禮初公出疆遇

秦丞相於昌邑以忠義相勉故公在喪相與通問公因歷叙虜有婦淵聖及諸王宗室意勸其遣使迎請秦浸不樂十六年公服闋再奉祠十七年夏洪公以散官安置英州公懼竄謫上書言臣使北時道遇秦檜教臣堅持使節臣得奉以周旋又醫官榮州團練使李子厚語臣云檜在中京嘗代徽宗皇帝移書黏罕述海上盟約及用兵講和利害結好基此會曹勛繳進其書詔付史館十九年四月遂除公敷文閣待制提舉江州太平興國宮磨勘轉朝散朝請即屏居蕭寺食間祿者十年二十五年秦薨上首起公知池州明年春至郡忽不樂

踰時復請祠歸道由廣德軍假官舍居之六月丁酉公
生朝也先一夕沐浴就寢詰旦家人起為壽安卧逝矣
轉朝奉大夫致仕遺表聞贈中奉大夫享年六十一後
以子升朝累贈少師娶同郡李氏封令人前卒累贈魯
國夫人二十七年某月日葬四明西山母永寧郡夫人
墓側三子孝覽朝議大夫通判平江軍府事孝曾朝請
大夫直秘閣權福建路計度轉運副使孝忠朝請郎權
知荆門軍三女長許嫁左從政郎臨安府司法叅軍沈
洵而卒次適朝請郎權前知邵州唐準次適蘄州貢士
袁如晦亦卒孫男五人從之從政郎池州司理叅軍徽

之將仕郎改之登仕郎元之將仕郎永之將仕郎孫女
六人長適進士韓師禹次適進士衛葆餘未嫁公平生
孝友婦遇郊恩徧奏諸弟後多顯者其在北方太夫人
命猶子孝祥後公：婦有子而鍾愛孝祥愈甚已而魁
多士掌書命為時名臣諸子亦以才聞張氏之興庶其
在此公天資勁偉遇事慷慨酒酣耳熱悲歌憤激常以
功名自許車駕留江上強虜逆臣連兵入寇公冒險出
使人皆危之及被囚拘略無悔懼賦詩作文考訂史傳
著述動盈編帙婦獻所聞納忠于朝將有施為以償素
志既不遂歎曰身在異域視死如歸為國事也今士大

夫有告言連坐之風一或抵罪家破名滅竟亦何裨悉
取舊稿焚之惟晝夜潛心經典學道日以有得無田無
廬未嘗過而問焉高宗更化方且進用而公無意斯世
矣惜哉遺文十卷益公身後所哀者銘曰

中興之功 有隱有顯 戎狄外膺 憂虞內殄
赫々將相 公槐鼎鉉 單車孰乘 密指臨遣
艱難險阻 維繫輾轉 如淪蛟淵 如探虎圈
公曰不然 蹈義者鮮 忠信篤敬 蠻貊可免
誠心洞開 古誼丕闡 以漸以漬 以聚以辨
野惟或馴 善意相勉 迄潰于成 績效莫淺

萬里來歸 宜舒而卷 誰其冒疾 天則福善
慈親迎門 温清重展 若弟與子 流慶方衍
超然死生 彰厥履踐 昭以銘詩 詔後悠緬

淮西帥高君 夔神道碑 慶元六年

廬州高府君屢帥邊天子閔其勞有詔赴闕會君移病
請祠主管亳州明道宮者再升提舉者一素愛廬阜之
勝因葬母司徒氏於山南遂卜居九 江至是築識山
堂日與賓客對諸峯飲酒賦詩間輿疾從山僧游或累
旬忘返意甚樂焉慶元四年八月十四日卒於家明年
三月十日葬母塋之右訖事其孤叔獻衰經不遠數百

里踵門泣且拜曰先君病甚命叔獻云我昔遣汝乞爾
祖母之銘於周益公其載吾家仗義來歸及當時北虜
叛盟始末詳實我死汝必往求文刻之墓隧以成吾志
叔獻為是暫捨几筵以求惟公哀許某侍帷幄竊見孝
宗皇帝內修政事欲掃穹廬而空乏黃金招樂毅白璧
賜虞卿未嘗一日忘北向以君數畫安邊闢國之策由
是倚為長城鼎湖龍去君亦休矣於此深有感焉乃掇
朝請大夫新成都府路提點刑獄王源狀而次序之君
諱燕夢字仲一其先登州人曾祖鵬宣德即知江陵府松
滋縣因任海州遂家駒山縣妣周氏祖昇隱居不仕妣

許氏父溥贈中奉大夫妣令人趙氏司徒氏金虜據中
原紹興十一年中奉舉族歸朝既講和例遣還憂憤以
沒君自少讀書過人文筆翻：嘗舉于鄉耻仕虜廷三
十一年元顏亮謀入寇君奉母航海來歸特免文解魏
勝起義克海州張忠獻公都督江淮奏君下州文學權
駒山主簿母子得還里虜屢遣重兵攻城君為勝分守
東壁躬冒矢石圍解第功版授迪功郎隆興二年割棄
海內易太平州蕪湖縣主簿員外置郡守吳芾連委攝
邑奏其治狀乾道五年改賜將仕郎出身調荆門軍長
林尉六年上遣聘使議陵寢君以封事列進取三十條

陳虜中山川險易將帥兵甲州縣芻糧及阿骨打以來
用人得失賜對口陳方略上大喜明日改承務郎添差
安豐軍簽判仍釐務八年諸司交薦召奏事至則分水
塞為五軍各置首領月給廩食責以教閱沿淮多盜北
馬上親札禁止君請毋市駒對境以絕其弊風馬牛皆
縱使婦大闢學舍邊人始知俎豆淳熙元年二月除直
秘閣再任上密諭君邊臣多言虜欲敗盟適謀者武功
大夫陳琛告知亳州大弟千戶者為虜所治欲委質
本朝君力言生事誤國不可聽願擇將練兵以需機會
上嘉納之會幕官章駟詐本路漕張士元奪其愛妾下

君究實當路右士元君直之坐易施州地隣黠播君欣
然奉母以行值歲歉餒死相望聚為義冢雙花發其上
大姓譚汝翼一方巨蠹誣姪殺人將論如法君平反之
其人後生二子泣謝曰活我父子者公也汝翼尋以惡
積抵罪秩滿移知文州君先已單舸下峽五年入對除
尚書度支員外郎歲中徧攝五司宰士闕上欲用君宰
相難之六年五月上親擢司農少卿倉庾地卑君始梁
空敷板米以不腐七年湖北謀帥上曰高某有帥才除
直龍圖閣和江陵府歲旱宴集饋遺皆罷力修荒政劾守
令奉行不虔者聞鄰路忠萬二州易子而食即移粟萬

計泝江助之九年特轉一官再任西南蕃羅鬼國在真
宗朝嘗來鬻馬後為羅殿國所限有導其假道沅州蠻
界互市如舊者君謂不可罷之徭人梁牟入省地劫民
財君遣將擒捕而釋其脅從江湖多劇賊君造飛江輕
舸付神勁軍盜發立得大姓吳氏囊橐止命君破其家
易置巡檢寨距府十里有沙市鎮大商輻輳居民擲比
每患延燒君下令按火巷通水道凡可使人皆勇為之
丁母憂十一年服除知揚州兼淮東安撫上念襄陽邊
防尤重十二年正月加秘閣修撰移帥京西襄恃三山
為險而中峴居峴萬二山之間下視府城君置柵種木

積糧貯甲預為外禦內守之計又疏水渠古迹溉民田
日以強弩教神勁軍適有旨射鐵簾士已素習詔許附
駐劄軍試其藝多被賞者積本道迎勞及他郡互送錢
八千緡增市戰馬置大安監游牝其中孳生蕃息用補
騎軍之闕一新學宮創閣奉御書治聲轉聞十四年二
月進右文殿修撰再任幕府益整暇與其劄宗任涉纂
襄陽志四十卷該貫古今自為之序十五年八月改帥
淮西君上書言虜常自廬入寇如蹈無人之境非獨地
勢坦夷正坐城郭不脩乾道中雖築十五里今浸隳圯
謹圖上新城制度惟陛下亟圖之上遣漕臣王厚之總

領張抑都統制閻仲偕來相視請如君言詔三司共成
之居無何病足求去紹興元年春徙知贛州歲儉州縣
捕治丐穀者數百人誣以聚衆君皆釋之薄征緩刑就
廩饑民以新城壁暇日率教授入學講經義增置弟子
員監司欲廢併龍南縣以避瘴癘君執奏而止二年再
帥廬州道令奏事俄改明州兼沿海制置司事首置兵
籍刺舉將吏軍政肅然庫務以酒貫民追督高價君或
蠲或代償積弊以除大姓迫人至死君踈族適有居境
內者請求不遂則以語動君下之獄取旨裁決人服
其公猶坐削一官與邊郡四年春復帥廬君每念城役

未竟於是裁節經費晝夜督視閱數月告成五年秋被
召而君不能造朝三歷亮祠遂致其仕積階至中奉大
夫享年六十有一葬地在南康軍星子縣丹桂鄉黃龍
山先娶同里杜氏宣教卽磐之女繼室以其妹並封令
人五男叔暘叔豹叔夜皆早世叔獻從事卽房州司理
叅軍叔夏將仕卽二女長適文林卽德安府觀察支使
王頤次未行孫將仕卽庭瑞君事親孝謹睦族有恩既
分俸周從叔又官其子桐天資敏明遇事迎解長於論
兵援古證今動數百言屢更方面所至內欲固圉外圖
恢復孝宗嘗曰卿功名中人也薦舉屬吏將佐近二百

人後多知名有文集十卷奏議三十卷銘曰

於皇孝宗德侔周殷欲信威于北夷遂據憤于西京
若時高侯謀紹營平嘗將屯于上谷亦馳至于金城
何鑑基之既立而機會之難乘未受呼韓之朝莫寫
麒麟之形悼夫君而太息宣遺恨于斯銘惟宅兆之
允減偕康廬其永寧

吏部尚書鄭公 丙神道碑 慶元六年

孝宗皇帝孜孜人才尤精擇於初常曰一寘周行遂階
顯用不審可乎既用矣察其直諒不欺則始終與之故
二十六年間侍從多名卿吏部尚書鄭公其一也公諱

丙字少融上世當五季時自安陸徙家福州長樂縣曾
祖芳祖堯父過世有隱德公貴贈父宣奉大夫母王氏
贈淑人公生穎異九歲能屬文日誦書萬言紹興十五
年擢進士第五補左從事郎平海軍節度推官秩滿充
建州學教授兩安定郡王令於令讓參知政事揚椿
辛次膺知樞密院事賀允中皆號名臣公適在所隸交
章以薦改左宣教郎辛嘗語公官職易耳使人尊仰實
難公服膺焉入為太學錄以父憂免二十二年內禫轉
奉議郎為國子監主簿詔求直言公上從諫遠佞勤政
用人裕民練兵六事會辛公為御史中丞辟公檢法官

隆興元年十二月遷監察御史虜亟求成朝論不一公謂不可遽明年六月出提點荆湖北路刑獄摧攝之禁方嚴荆襄制置使沈介用待次官行江夏令邊事方殷信陽軍守臣陽委印赴制司公皆持檄鐫詰介怒奏乞引避上不得已下遷湖南提舉常平茶鹽乾道元年值章賊李金陷郴州焚桂陽軍尹寬起寧遠縣以應之衡邇賊巢提刑託行部避其鋒常平亦置司在衡公兼程疾趨督州將治城訓兵復諭常寧縣世忠洞首李昂霄發壯丁禦賊民恃以安公劾郴桂守弃城乞鄂軍濟師糧餉不足發義倉佐之賊平協助為多二年春鄉人

林安宅為諫議大夫素不相合求主管台州崇道觀三年起為成都府路轉運判官勅監四川類試草挾書繼燭之弊虞丞相允文以樞臣為宣撫使集四路漕議事盛稱公賢還朝薦召六年正月入對上喜曰卿初御史也除尚書禮部員外郎時陳正獻公俊卿與虞公為左右相高選王卨講讀官公直講王府與芮燁李顏穎劉焯四人並命陳公去公亦出為江西轉運判官進直祕閣改河南提刑有旨招振華軍二千帥司欲速至涅士人公立命改正瀏陽縣歲歉豪右移粟售他境鄉民紛競尉以嘯聚張大其事漕請調兵追捕歸罪團長陳淮

下之獄公亟約常平司出米數千石彈壓賑濟杖淮釋
之漕有內援奏公姑息貶秩一等而罷衆論不平復提
點廣東刑獄適漕兄弟為經畧使公引嫌移使西路遠
方官吏不奉法公深行瘴鄉一裁以正邕守重賦歛得
公束約請祠去歸正官沙世堅素武勇坐贓決配靜江
部有劇賊未獲公諭世堅立功贖過世堅馘渠魁以獻
公為奏稍復其官後平李接以總管守宜州一路賴之
閩部益災壞上雅信公徙本路轉運副使公知福之嶺
口 頭海口三倉本錢不繼命積錢對償又汀劍等號
上四州高估抑售公委邑令置場支賣科擾頓絕至今

守其法淳熙四年召為吏部郎中踰月兼中書門下省
檢正諸房公事議者謂舊法命官訴雪罪犯一歲別勘
三歲別定以防枉撓乃者有司憚煩煩 元勘官伏其
誤始許改正實抑之也章下三省公謂復舊便執政曰
上意似不然公厲聲曰事當問理若逆探上意而違之
豈大臣事乎執政怒徙公大理少卿五年二月也尋充
御試編排官即殿幕擢祕書少監累轉朝散大夫車駕
幸省轉朝請大夫面賜金紫明日進祕書監不數日兼
權中書舍人會諫議大夫蕭燧論夔帥李景孛貪虐而
大臣庇之於是叅知政事趙雄謂燧誤信蜀人謗書既

捕治其人因改燧刑部侍郎尋出知嚴州公言臺諫劾
奸邪反屈抑而去豈國家之福耶六年輪對奏乞四川
襄漢江淮置三大帥擇曾任二府有文武威望者各當
一面復列上五弊一曰取士代筆傳義出行富人以賄
得科第二曰養兵冒名寄籍關額不補懦弱不汰一有
草竊輒動御前之軍三曰理財以橫斂預借重折苛征
為能四曰刑獄放縱大辟淹留奏案五曰薦舉非權要
請托則謬舉親舊群至殿陛徒有引騷之名上甚嘉納
勝選德殿御屏之上真拜中書舍人公䟽官冗賞濫卿
監丞簿事簡官備館職史官至二十員學官書局各以

十數監司郡守疊授三政叅議歸正添差養老將校充
滿外路東宮撤章館閣進書雜流廝役例需賞典曰寵
寵曰應奉開河修堰併賜蠲賦無時推恩他司錢物漕
乞移用尉不捕賊詭奏有功張大虛聲橫被釀賞累數
百言上批賞功遷職不以濫予丙言是也給舍遇書讀
宜隨事以聞又論臺諫獨員無助察官不應專取歷知
縣人未幾召用顏師魯張大經劉國瑞皆二千石部刺
史有聲者聖政日厝中興會要成連轉朝議中奉大夫
七年五月除禮部侍郎仍兼外制公言司封法不許以
官回授封贈比多援例下至祕書省吏以無用之減年

亦得之請一切勿行詔可八年吏部尚書王希呂知貢
舉公及侍御史黃洽副之有沮公者謂丙洽皆福州人
上曰恐有偏邪然皆無私暨揭榜三人同對上曰考校
甚公遠方得人雖不分路可也轉中^大夫兼給事中時遴
待補太學法公視臨安府學籍許試者三百餘人游士
群訴臺諫寔至夜喧集公第公入奏待罪先是春坊陳
龜年女嫁大姓裴良珣良珣醉死其兄良顯訴龜年女
利其富死有寃狀事下臨安語涉龜年府尹不敢治上
令送大理寺朝士有為地者詔轉運司先審責良顯不
實反坐乃施行公駁奏語侵臨安且云願少存國法為

子孫萬世之業竟送大理至是尹誅冒試人使逞憾上
批無罪可待令寃為首者尹謂公茫閩人不當深治上
怒語宰執呼尹諭旨卒杖丁如植編管鄰州前戶部尚
書韓彥古負氣多援公因其起廢極口詆之至云仰累
聖德他日入謝因言論事欲激切語或過當望陛下恕
罪上曰朕自喜給舍得人樞密使王公蘭時為宗正丞
亦為上言今日不欺陛下惟鄭丙惜其愛莫助之耳九
月兼左侍郎乞文武添差官並不釐務有郭世華尋醫
歲滿參部法當察脉鑿有恃力受其賄公執送棘寺銓
選清平無敢干以私九月進權吏部尚書同修國史九

年正月上辛執政當祈穀有故以侍從攝上特差公尋
兼侍讀取陸贄奏議切時者反覆開陳進司馬光五規
范祖禹帝資一覽嘗乞勿聽妄獻利害紛更庶事又論
治贖吏太寬上並以為然次日舉二事諭宰執有安靜
之褒八月正除吏部尚書轉大中大夫公常曰范鎮六
十三致仕吾已遲一年上章請去十年二月除龍圖閣
學士知建寧府政尚嚴明千里肅然浙東謀帥移知紹
興府以減否郡守後時降中大夫上銳更法手札訪公
欲通差官 民戶公謂通差害多著令里正專掌盜賊
煙火比來邑官責以應辦至於破產若以免役錢募耆

長供他役則善矣攢陵勅使駱驛輔藩多權豪公不少
假借群起造訛公聞請祠上初不許適諫官亦部人助
以風聞竟提舉江州太平興國宮皇城邏卒因誣公載
官米萬斛而去漕遣其屬趙善后覈實無之上語執政
使鄭丙有是則今日無人可信矣秩滿再提舉隆興府
玉隆萬壽宮轉通議大夫起知泉州光宗登極語宰執
曰侍御史胡晋臣言初政當召用人才如鄭丙張大經
楊萬里是也尋詔公年德俱高踐揚滋久進端明殿學
士公應詔上封事数千言以謹始為戒覃轉通奉大夫
治泉如治越或勸從寬公曰惟有德者能以寬服民吾

固非用猛者然嫉惡有素豈以晚節喪所守哉閱半年
改知潭州言者沮止易太平州固辭復提舉興國州轉
正議大夫紹興四年引年致仕轉正奉大夫時史丞相
浩汪尚書大猷沈參事樞右司郎中周頡與公皆同年
進士退休于二浙詩筒唱酬人競傳之俄屬疾屏醫藥
以後事付家人而逝五年八月十四日也享年七十有
四贈金紫光祿大夫子升朝特進爵安陸郡開國侯食
邑一千八百戶實封百戶妻淑人柯氏同郡右文殿修
撰棊之孫前卒以慶元二年十一月十二日合葬於懷
安縣沙溪之原三子頤孫故奉議郎通判辰州懿孫故

承務郎監潭州南嶽廟慶孫承務郎三女長適朝奉郎
知吉州太和縣卓洵次適通直郎知汀州上杭縣蕭輅
次適迪功郎道州司法叅軍柯謙宗孫男五人安祖似
祖並承事郎揚祖通仕郎餘幼孫女三人長適迪功郎
新泉州德化縣主簿葉莫公學術純正文辭贍縟有家
集外制奏議講義三十卷居鄉接物極其和易當官立
朝則氣節凜然上深重之是時繳駁之任不由進擬公
常以貳卿兼領感激盡言數犯貴要之鋒在銓部抑僥
倖懲姦欺益餘事也嘗薦蕭公燧胡公晉臣羅公點後
俱至二府見謂知人其他如李燾之博洽劉國瑞之清

正林栗林斫鄭湜之剛方唐仲友之學問援引不少置
善類歸心為其在紹興間繼公為太學錄晚同朝又意
氣相投會都司用私意治王定國冒歸正賞予按都督
府文書辨其誤公奏都司方舉職政府乃欲沮之其不
黨同類此公之卒願孫以刻見屬而不果今卓君示公
友壻林御史采所狀行實乃參以聞見碑公墓道其銘
曰

維南有閩山環水聚是生良材接武王所
挺：鄭公如松之喬碩大堅剛歲寒後凋
持節典州彰善瘴惡既鋤吏姦亦蘇民瘼

帝思其賢禁密以審守正觸邪知無不言
舉朝僉諧當宁眷顧何待弼直乃為聖遇
昔者漢武明於知人欲稱汲黯近社稷臣
相行將青任非不寵孰如九卿敬禮加重
以今準古庶其似之匪直公褒阜陵是思

平園續稿卷第二十五 終



